

شريف أسعد

# تكريات مهنوعه

اعترافات جامدة  
الكتاب الثالث



شريف أسعد

كوميكس  
تكريات مهنوعة

اعترافات جامدة  
t.me/comics\_link  
الكتاب الثالث

للقرائة رغبه لا تنتهي





# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه



# كوميكس

إهداء

«إن لم أستطع أن أملك السعادة.. فسوف أصنعها».  
إلى كل من ساهم بإخلاص في وضع ابتسامية على الشفاه،  
لا يبتغي من ورائها إلا رضاء الله سبحانه وتعالى.

أهديكم هذا الكتاب.

أولكم «أبي» رحمة الله عليه.  
[t.me/comics\\_link](https://t.me/comics_link)

للقراءة (غبه لا تلتهم)



## المحتويات

٩	هذا الكتاب
١١	مقدمة
١٣	الاعتراف الأول: تيتانيك المحروقة
٢١	الاعتراف الثاني: أبابا.. في حراسة المرمى
٢٧	الاعتراف الثالث: الزلزال.. واللي من ريحته
٣٤	الاعتراف الرابع: يا ليلة تين
٤٢	الاعتراف الخامس: قنafd الحب.. وأشواك الغرام
٤٩	الاعتراف السادس: ذا لاسٲ قرموط
٥٥	الاعتراف السابع: يحيا القرموط
٦١	الاعتراف الثامن: قفزة القرصان الأخيرة
٦٧	الاعتراف التاسع: خضار حساوي
٧١	الاعتراف العاشر: عصر الطوب انتهى
٧٧	الاعتراف الحادي عشر: سينما الأطفال
٨٤	الاعتراف الثاني عشر: ملك الجن اتحرق





## هذا الكتاب

هذا الكتاب ليس مجرد كلمات وجمل تراصت لكي تُدخل البهجة على قلب من يقرأها، على الرغم من أن هذا في حد ذاته يُعد إنجازاً يستحق تمثلاً من البرونز يُوضع مكان تمثال طلعت حرب في وسط البلد. ولكن تعالوا نتذكر معاً عائلتنا، في خضم «هرس» الحياة للجميع وكأنا «كيلو طماطم» من أجل الصلصة.

وفي هذا السبيل، يؤكد الكاتب مرةً أخرى، كما أكد في الجزء الأول، أنه ليس مسؤولاً بأي شكل من الأشكال عن حالات الضحك الهستيري التي تنتاب القراء، ويُعلن عدم مسؤوليته عن علاج الكسور الناتجة عن سقوط القارئ العزيز من فوق أريكة أو سرير أو مكتب ضاحكاً، كما يتمنى ألا يكون له أدنى صلة بتعليقات السادة القراء التي لا تنفك تطارده، على شاكلة: «أنا لو اطلقت هيبقى بسبيك»، أو «هاترفد بسبيك»، أو «الناس بتقول عليّ مجنون في المواصلات»، ومثل هذه العبارات التي لن يتحمل الكاتب مسؤوليتها على الإطلاق. اللهم قد بلغت.. اللهم فاشهد.

شريف أسعد

## مقدمة

حقبة الثمانينيات والتسعينيات، تلك الحقبة الماسية التي كونت  
لجيل كامل، ذكريات متشابهة إلى حد كبير.

نحن عائلة مصرية بسيطة، كالسواد الأعظم من العائلات المصرية.  
أسرة مكونة من خمسة أفراد، يقودهم الأب المصري الصميم،  
وترعاهم الأم الرؤوم لكل فرد في مصر، وتتكون الذرية من الأشقاء  
الثلاثة، أبطال المواقف والحكايات، ومخزن ذكريات اليوم والغد  
في كل بيوت مصر على مر الزمان.

الكثير منا يشتاق إلى لحظات وسط الأب والأم والإخوة،  
بلا التزامات، وبدون أعباء الحياة. كم منا يتمنى يومًا واحدًا بدون  
محمول، أو مستقبل رقمي (ريسيفر)، أو مناقشة سياسية تنتهي بـ«ست  
غرز فوق الحاجب».

اليوم نسافر إلى ذكرياتنا بشكل ساخر بسيط، عبر مواقف عشتها،  
وعاشها الكثير منا بشكل أو بآخر.

اليوم نتحدث عن مواقفنا التي حُضناها مع أصدقاء الطفولة



والشباب، المواقف التي عايشناها مع عائلاتنا الحبيبة، المواقف  
التي تترك في داخل كل شخص منا ما يجعله يبتسم حين يتذكرها.  
اليوم أذكركم بكل أب وكل أم وكل أخ لكم.  
تعالوا أقص عليكم قصصي...

# كوميكس

[t.me/comics\\_link](https://t.me/comics_link)

للقراءة (غبه لا تنتهي

# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه





## الاعتراف الأول تينايله المحروقة

كان صدى صوتها بيرن في وداني.. حبيتي فيروز.. وهي  
بتشدو وبتقول بصوتها العذب: آخر أياام الصيفية.. ترالم ترالم..  
والمشعارف إيه شوية شوية.. تارارارارار.. طلعت مسالبايليبيبيببي..  
واتقلبت بينااا العربية.. ترالم ترالم...

أيوه.. هي قالت كده. إنما الحقيقة هي ما كانتش صيفية قوي  
وقتها.. هي كانت في أواخر الشتاء قبل اللي فات بتاع إلسا الله يديها  
الصحة.. الجو كان تلج.. بس أنا ما كانش ينفع أروحله من سكات..  
كنت هاشتهر بعد كده بشريف سوستة.

الشلة بقى بتاعة الثانوي.. شلة الفساد الأعظم اللي لما كنا بنتجمع  
ما شاء الله علينا.. كان الشيطان بيخس ينام وهو مطمئن ومتأكد إنه  
سايب الدنيا في إيد أمينة.  
اتصالات.. اتفاقات.. هنخرج؟ يلا.. عاوزين نروح مكان جديد..  
أكيد...

وعادة التجمع ده من الشباب الفاسد لما كان بيروح مكان جديد.. كان غالبًا المكان ده بيبقى افتتاح ووراء بساعتين إعلان تصفية. ما شاء الله كنا بنأتي على الأخضر واليابس.. شلة من نسل يأجوج ومأجوج بتسرح في شوارع مصر وربوعها لا تعرف معنى الشبع.

المرّة دي قررنا فعلاً نعمل حاجة جديدة.. بعيد عن الأكل والظروطة.. طب إيه يا جماعة؟ نعمل إيه؟  
الكورنيش.. مركب لطيف.. الشلة وشلة الشلة.. المرّة دي التجمع كبير وحلو.. إحنا حوالي ٣٠ واحد.. الله!

طبعا صاحب المركب شايف مجاميع من الصيغ عاوزة تتركب مركب.. فقلقان طبعا.. لأن السحن دي مش وش فُصح إطلاقا.. دول شكلهم هيهربوا بضاعة في النيل زي فيلم «النمر والأنثى» بتاع شنب الشاويش طلبه.

لكن قصاد أسلوب الساحر وتريتي العالية.. الراجل لم يجد محيصا من إنه يوافق على إننا نطلع في المركب ساعتين فسحة مقابل مبلغ مالي معتبر:

- بص أعمو المراكبي.. إحنا ولاد ناس.. كلنا متربيين كويس

والله.. وللأمانة.. كلنا ما عدا بس التسعة وعشرين واحد التانيين اللي معايا.

- يا كابتم أنا عينيا ليكم.. بس أنا مش عاوز مشاكل.

- طب بدمتك ودينك.. دي مناظر ناس بتاعة مشاكل؟! المشاكل

دي بتعملها ربات البيوت.. إحنا أقل حاجة بنعملها بتتصنف

كارثة طبيعية.. في ناس هنا يبقوا ولاد أخت البركان.. وفي  
مجموعة من عيلة الأعاصير!

- أنا مش فاهم ساعاتك يا كابتم.. بس شكل كلامك محترم.  
- لا.. هو أنا أعجبك قوي.. أنا عاوزك تطمن على الآخر لأن دول  
خيرة شباب الجحيم.. وأحد أفضل الأفراد المنتمين إلى عالم  
الأحداث.. ومفيش حاجة منعانا عن إنهاء الحياة على كوكب  
الأرض غير إننا ما اتمسكناش لحد دلوقت مش أكثر.  
- اللي تشوفه يا كابتم.  
طبعًا الراجل فاوضني على الفلوس.. واتفقنا ناخد المركب  
بأربعين جنيه لمدة ساعتين.

وهوب.. بقايا المحاربين الساموراي نطوا بقوا في المركب..  
المركب الشراعي اللطيف اللي القعدة فيه على كنب قماش مزركش  
مريح.. والمركب منور بلمبة جاز جميلة رومانسية متعلقة جنب  
إيد الراجل اللي بيحرك المركب والشراع والدفة.. وكاسيت قديم  
نشغل عليه أغاني علي حميدة.. لولاكي.. لولا لولا لولا.. لولاكي  
ما اتسميت.. ترالم ترالم.

وطبعًا انطلقت المركب بفعل الرياح.. وبدأنا نرقص ونغني  
ونستمتع لفترة جميلة.. وبعد كده ابتدينا نأفور ونهزر ونمسخ بقى..  
ونمد إيدينا على بعض على سبيل الهزار الثقيل.. ونجري ورا بعض  
في المركب.. ونضحك ضحك ماجن بقى.. وحقيقي هزار ممكن  
أي إنسان سوي يصنغه على إنه هزار غبي.

طبعًا أعمو المراكبي ابتدى يتضايق.. ودي حاجة ما عجبش



أسامة الليبي صاحبنا.. الشهير بـ«مازنجر» أساسًا.. اللي اتدخل لما  
المراكبي قال:

- يا شباب يا شباب.. نخف الهزار شوية الله يخليكم!

- إيه يا اسطى؟! فيه إيه؟! براحتنا!

- أيوه يا كابتم.. بس برضه بالأصول!

- مفيش أصول.. إحنا براحتنا.. إنت ليك فلوس وتسكت!

طبعًا كلمة من هنا على كلمة من هنا.. في صحاب اتحمقوا  
لصاحبهم والباقي تدخل للتهدة.. إنما كان فيه برضه محاولات  
تحرش.. ومد إيد...

وهوووووووب.. أسامة بيشد الراجل من هدومه يسحبه عليه

كنوع من أنواع الهاخلي يومك إسود.. الراجل بيشوح بدراعه على

سبيل الليلة أبوكو طين.. إيد جت في لمبة الجاز اللي متعلقة جنبه

في المركب وقعت اتدشت.. الجاز مسك في قماش الكنب.. المركب

ولعت في أقل من أربع ثواني ونص إلا خمسة.

والآن موعدكم اليومي مع فيلم السهرة.. فيلم: الياختا!!!!!!!!!!!!!!اي

المفترس.

إنه انتقام الرب.. هنولع في النيل يا ختا!!!!!!!!!!!!!!اي!

جري بقي.. إنما هنجري نروح فين؟ هنجري فين يا ختا!!!!!!!!!!!!!!اي!

نصنا خايف وبيلطم.. والنص الثاني بيحاول يتصرف.. طبعًا أنا معروف

في أنني نص.

- هنعمل إيه يا شرييييييف؟

- عملكم اسود يا ختا!!!!!!!!!!!!!!اي!











## الاعتراف الثاني أبابا.. في حراسة الهرمى

كنا بنستنى المصيف كل سنة عشان ألف حاجة وحاجة.. خروج.. فسح.. سهر.. وكمان لعب الكورة في الشارع مع صحابنا. أحلى أوقات المصيف وقت العصرية.. قصاد البيت في شارع ٣ في المعمورة.. فريق عظيم مكون مني أنا وإخواتي وصاحبنا أحمد حسين.. وفريق ثاني من مجموعة شباب إسكندرانية من سكان المعمورة كنا بنقابلهم كل مصيف في نفس التوقيت.. بقيادة حسن الأسمر.. لا مش بتاع كتاب حياتي يا عين..  
ده كان شاب إسكندراني أسمر طول بعرض يلعب في ناشئين الاتحاد السكندري.

حسن حبيبي اسم الله عليه وعلى تكوينه.. كان طول بعرض بارتفاع.. اللهم صل على النبي واحد وعشرين قدم.. نوفروست اتنين باب بحنفيه ميه ساقعة من قدام.. كشك حلويات ماشي في الشارع.. هو وفرقة كان ماتش ليهم وماتش لينا.. كانت المنافسة يومية.. منافسة حقيقية.. حماس.. إصرار.



## الاعتراف الثاني أبابا.. في حراسة الهرمى

كنا بنستنى المصيف كل سنة عشان ألف حاجة وحاجة.. خروج.. فسح.. سهر.. وكمان لعب الكورة في الشارع مع صحابنا. أحلى أوقات المصيف وقت العصرية.. قصاد البيت في شارع ٣ في المعمورة.. فريق عظيم مكون مني أنا وإخواتي وصاحبنا أحمد حسين.. وفريق ثاني من مجموعة شباب إسكندرانىة من سكان المعمورة كنا بنقابلهم كل مصيف في نفس التوقيت.. بقيادة حسن الأسمر.. لا مش بتاع كتاب حياتي يا عين..  
ده كان شاب إسكندرانى أسمر طول بعرض يلعب في ناشئين الاتحاد السكندري.

حسن حبيبي اسم الله عليه وعلى تكوينه.. كان طول بعرض بارتفاع.. اللهم صل على النبي واحد وعشرين قدم.. نوفروست اتنين باب بحنفيه ميه ساقعة من قدام.. كشك حلويات ماشي في الشارع.. هو وفرقة كان ماتش ليهم وماتش لينا.. كانت المنافسة يومية.. منافسة حقيقية.. حماس.. إصرار.



- أفنظم أبابا.. آخر أوامرك قبل ما حسن يدوسني.

- اقل الزاوية بتاعتك يا حيوان!

- أبابا.. حسن كسر الزاوية بتاعتي ومحتاجين نلحمها.

- انشف شوية يا حيوان!

- أنشف إيه أبابا؟! ده وابور زلط لابس شورت!

- إنتو ما بتعرفوش تنزفوتوا تلعبوا يا حيوان!!!!!!

- أبابا ده مش لعب.. ده إعادة تمثيل لمشهد إنزال جنود الحلفاء

على الشاطئ في معركة نورماندي يا خت!!!!!!

- أنا نازل عشان أساعدكم يا حيوان!!!!!!

- يا سوااادي!! هتنزل فيسين أبابا؟!؟! خوود.. خوووووود بس.

أبابا يا عيني الحماسة أخذته بعد ما شاف ولاده المساكين بيدوسهم

أتوبيس نهري بجزمة كورة بزايض اسمه حسن.

قرر يتدخل لأول مرّة في حياته في حاجة زي كده.. وهيلعب

كورة على الأسفلت.. يا خت!!!!!!!!!!!!!!!!!!!!!!

- أنا هاقف جون يا حيوان! العبوا كويس بقى.. مش عاوزين

نتغلب.

- يا خبر إسود ومهيب!! هتقف بالشبشب أبابا!!

- لا طبعًا يا حيوان.

- آه أنا قلت كده برضه.. مستحيل.

- هاقف حافي يا زفت.

- أحيه بالسسم.. إنت مين يا راجل إنت؟ فين أبابا؟

- العبوا عدل بدل ما أخليه مصيف إسود على دماغكم!



- ليه؟ لبيبييه؟ أبابا.. اطلع أبوس قعر شبشيك!  
إنما هو أصر بقى.

وحسن قرر إنه لن يرحم أحدًا في طريقه لإعادة سفلة الشارع  
مرة ثانية.. بما فيهم عيلتنا.. يا ختنا!!!!!!!!!!!!!! اي!  
وتحول الماتش من مباراة في كرة القدم.. إلى مباراة لمحاولة  
الحفاظ على حياة أبابا عن طريق حذف الكورة بعزم ما فينا يمكن  
عربية تدوسها تفرقع ونخلص.. المهم حسن ما يقربش من أبابا في  
دايرة قطرها مترين.. حتى لو اضطرينا نتنازل عن أجزاء من هيكلنا  
العظمي لحسن.

إنما الحكاية اتطورت بقى.. وحسن قرر يهاجم.. وأنا وإخواتي  
قررنا ندافع.. مش عن الماتش طبعًا.. يولع الماتش.. الماتشات بتروح  
وتيجي.. إنما أبابا لو راح هنشحت في الشوارع كلنا.

- خلي بالك يا شريف حسن بيجري ناحية أبابا!!!!!!!!!!  
- أعمل إبيبييه يا ختنا!!!!!!!!!!!!!! اي!

- ارمي نفسك على كبوت حسن.

- يا ختنا!!!!!!!!!!!!!! اي.. آ!!!!!!!!!!!!!! اه!

- خد بالك يا شريف حسن هيشوط في أبابا!!!!!!!!!!

- أتصرف إزاي يا ختنا!!!!!!!!!!!!!! اي!

- خش بمناخيرك في بوز جزمته واعمل ف!!!!!!!!!! اول.

- الود!!!!!!!!!! اع يا ختنا!!!!!!!!!!!!!! اي!

- إنت يا زفت يا شريبيبييف.

- أفنظم أبابا!!!!!!!!!! اع.











وإحنا قاعدين بنناكف في كلاب الشارع بقى على الساعة ٢ الفجر كده.. عمو فاروق كان قاعد جنب أبابا وماسك كوباية الشاي من الترمس.. ويبسقي فيها بقسماطة.. وعمال يشرحله إن القادم أسوأ وإسود كمان.. وإن التوابع أكيد هتوقع البيت لو فكرنا نبات فيه.. والأبحاث العلمية كلها بتقول إن حزام الزلازل متعلق عند أبابا في الدولاب وهنتهدل آخر بهدلة. وطبعًا طبعًا أبابا.. لأنه بيثق في كلام عمو فاروق لأنه صحفي في جرنال قومي... ما كدبش خبر: - يا شربيسيف.

- خير أبابا ما صدقت أنام وأنا ساند على الشجرة؟!!

- اصحى يا حيوان وفهم إخوانك إننا هنغير من الاستراتيجية.

- إيه؟! هتتجوز على أماما؟! هو ده وقته؟!!

- بس يا زفت.. فهمهم إننا كل يوم بالليل هننزل نبات في الشارع.

- يا خبر اسود سواد جلة الجاموسة اللي خارج من تحت فرن

فطير! طب والبيت اللي اتربيننا ونشأنا وترعرعنا فيه ده.. هنقلبه

متحف آثار حيوانية؟!!

- يا حيوان لحد ما العلماء يأكدوا إن التوابع خلصت.

- علماء مين اللي يتشكوا في توابعهم دول أبابا؟

- عمك فاروق أهو.

طبعًا عمك فاروق أهو ده كان شغال في إعلانات الأهرام أساسًا..

وكانت معلوماته العلمية الأكثر حداثة بتتمثل في تدوير المفتاح في

كالون باب الشقة عشان يفتحه ويدخل.. وكان بيفشل فيه أساسًا

ويضرب الجرس لحد ما حد يفتحله.















## الاعتراف الرابع بأليلة تين

كل واحد فينا سيكون له نوع معين من أنواع الفاكهة يبحبه متفوق على باقي الأنواع.

أنا مثلاً لو اتحط قصادي تفاح ومانجة وعنب وبرتقال.. هاختر البرتقال. وبغض النظر عن إني وش فقر والكلام اللطيف ده.. إلا إني أقدر أدافع عن اختياري بأن ده ذوق يا جماعة.. أنا حر.

زي أبابا بالظبط.. أبابا كمان كان حر في اختياراته.. طبعاً مش قصدي اختياراته إنه يخلفنا لأن ده كان بلاء عظيم.. وأبابا كان راجل مؤمن.. وكان لازم ربنا يبتليه بهذا النوع من المخلوقات اللي تدخله الجنة حذف بدون حساب.

إنما هو كان حر في اختياراته في الفاكهة.. فكانت أكثر فاكهة يبحبها في حياته هي التين الشوكي.. اللي ما بيطلعش غير في الصيف.. واللي كان بسببه محافظ على وزن الأسرة المثالي تحت المعدل بتسعة كيلو.. لا مش من أكل التين حضرتك.. ده كان من كتر











- هاهددهم إنهم لو ما مشيو ووش هتصل بالبوليس .  
- ما إحنا اتصلنا خلاص يا شريف!  
- يعني هو كان اتنيل جه؟! أنا هاتصرف بقى .  
لبست الشيشب ونزلت جري على السلم .. لكن .. ضربة القدر  
كانت أسرع من لظمي على وشي .  
أول ما خرجت من باب العمارة .. لقيت عربية أبابا داخله على  
البيت بتتمخطر .  
وفعلاً .. أبابا وصل .. وركن .. ونزل من العربية .. ويتوع الأبو حلاوة  
يا تيبين بقى أكنهم اتفتحتلهم طاقة القدر فجأة .. حيوه تحية عظيمة ..  
كان ناقص بقى يضربوا نار ويرقصوا بالمزمار والحصان لأنهم عايشين  
على حسه تقريباً طول الصيف .

وحمد الله على السلامة يا عبد العزيز به .. ونورت بيتك يا عبد العزيز  
بيه .. ويا ترى تين إمبراح عجبك ولأ يا عبد العزيز به .. إنت خاسس  
يا عبد العزيز به ولازم تاكل بتسعين جنيه تين في اليوم .. ابعت الأولاد  
ياخدوا من كل عربية ربع طن تين يا عبد العزيز به ...

نزل عبد العزيز به وراح وقف جنب واحد منهم وابتدى ينأنا في  
التين .. والراجل عمال يقطع ويقشر ويديله .. وأنا عاوز آخذ القشرة  
أمسح وشي بالشوك لحد ما يلتهب من تخيلي للي هيعمله فينا أبابا  
بعد النأنة .  
- كل تين يا شريف .

- ميرسي أبابا .. الشوك بيخش في شفتي بيمر مطني!  
- يا حيوان بيتقشر!



- من فضلك يا حضرت .. خلىنا نشوف شغلنا!  
- طب بس قولى مين مقدم البلاغ وأنا هاكلمه أستاذك.  
- مقدم البلاغ سيادة المستشار عبد العزيز أسعد.

هنا وجبت الياختا!!!!!!!!!!!!!!!!!!!!!! اي مصحوبة ياغماءة بسيطة .. نعي الأهرام  
بكرة هيكون بعنوان: «فقيد الأبو حلاوة يا طيبين .. وابن عبد العزيز  
وأخو الشهيد وائل والقتيل هشام». وصفحة الحوادث هتتحقق رقم  
مبيعات هينافس مبيعات عدد القبض على ربا وسكينة.  
طبعا البياعين اتفاجأوا وابتدوا يبصوا لأبابا بصات استنكار  
عظيمة .. كل بصة فيهم معناها إخصصصصصصص ده إنت لحم تينك  
من خيرنا يا أستاذ عبد العزيز.

وأبابا بياكد للظابط إنه ما عملش بلاغ وأكيد في سوء تفاهم .. بس  
الظابط اللي ينشك في دبابيره بشوكة مصدية فهم أبابا إن البلاغ جاي  
من رقم تلفون ٣٧٥٥٣٧٠ .. وده طبعا كان رقم تلفون بيتنا اللي بياكد  
إن البلاغ سليم يا حضرات.  
أبابا حبيبي ربنا يحرسه كان لمام بقى .. فهم اللي حصل في ثانية ..  
وسكت .. بس أخذ الظابط على جنب واستسمحه يسيهم يمشوا من  
هنا لأنهم فعلا غلابة وبياكلوا عيش .. وإنه خلاص هيتنازل عن عمل  
بلاغ ومحضر وكده ويا ريت نلم الموضوع.  
وفعلا الظابط وافق .. بس أنا بقى اللي كنت مصمم وعاوز أروح معاهم  
القسم .. كان لازم أعمل محضر في أبابا بعدم التعرض ليا وإخواتي لما  
نطلع البيت .. إنما أبابا قفشني .. وما عرفتش أروح القسم للأسف.  
وده حضراتكم كان الأسبوع اللي غيرت فيه لون جلدي أنا وإخواتي





# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه



الاعتراف الخامس

## قنافذ الحب.. وأشواك الغرام

تربية الحيوانات من الهوايات العظيمة.. لازم تعلموا ولادكم يربوا حيوانات لأنهم هيتعلموا معاها يعني إيه مسؤولية.. ويعني إيه معنى الرحمة.

الرحمة اللي كانت أماما بتطلبها منا بصفة دورية وبتترجانا ننهي حياتها بسهم أمازوني عابر في المطبخ عشان يخلصها من المزارع اللي عايشاه بسببنا في البيت. خصوصًا لما كانت تيجيلنا الهفة ونرجعها شايلين أحد

المخلوقات اللي كان برنامج عالم الحيوان شغال طول النهار والليل يحذر منها كل جمعة بعد الصلاة لما الراجل حسه اتنبح.. لدرجة إن أماما كانت معتقدة إن تلفزيون بيتنا منقذ على غابات كينيا الاستوائية المطيرة.. كل البرنامج ما يشتغل نخش عليها بحيوان.

والحمد لله كانت بتنتهي دايماً حكاية الحيوان ده يا إما بإغماءة من أماما بتضرب معاها غطس في بلاط الطرقة.. أو هتاف مدوي من أبابا زي ما حصل المرّة دي:



















## الاعتراف السادس زلا است قرموط

«الصيد بيعلم الصبر يا حيوان».

دي الجملة اللي أبابا الله يرحمه كان بيقولهلنا أنا وإخواتي عشان يقنعنا ننزل معاه نصطاد سمك من نادي اليخت في المعادي الساعة ٦ الصبح في الأجازة.

يعني بعد حوالي عشر دقائق من بداية نومنا الساعة ستة إلا عشرة الصبح.

- قوموا يلاً عشان هنروح نصطاد.

- لا إحنا هنستاك وهنعمل الطحينة أبابا.

- يلاً يا زفت.. قوموا وخلوا عندكم شوية نشاط.

- أبابا ده إحنا لسه حاطين السلكة في الشاحن.. إحنا ٣٪ أصلاً.

- يلاً يا حيوان.. أو مال مين اللي هيحطلي الطعم في الصنارة؟

- عبدك الأسود الكبير أبابا.. أنا... حاضر أفنظم.

طبعاً حجم العياط اللي كنا بنعيطه لحد ما نوصل النادي

اللي مفيهوش دبانة صاحية حتى كان رهيب.. عواء كلاب بلدي  
مضروبة خرطوش في ديلها بلا توقف.

عملية فرد الصنائير والطعم وتجهيز العدة والسلك والسنون..  
محتاجة متخصص حاصل على دكتوراه في الهندسة الكونية..  
خصوصًا لما تبقى نمت ربع ساعة في ثلاث أيام.. بتبقى ناقص  
تبوس الصنارة.

طبعا جدير بالذكر إن في مواسم معينة لما كنت تقدر وقتها تصطاد  
جزمة كنت تدخل التاريخ.. ودي بتبقى مواسم مجرد محاولة الصيد  
فيها يعتبر مضیعة للوقت.. خصوصًا لما تكون بتصطاد بنوع طعم زي  
اللي بنصطاد بيبييه يا ختا!!!!!!!!!!!!!!!!!!!!!!اي.

- أبابا إحنا بقالنا ٤ ساعات واقفين وغالبًا السمك مسافر يصيف..

مش موجود!

- الصبر.

- الصبر إيه أبابا؟ إحنا بنكبر في السن وإحنا واقفين!

- الصبر.

- أبابا إحنا جُعنا وهناك طعم السمك اللي في الشنطة!

- الصبر يا حيوان!

- يا ختا!!!!!!!!!!!!!!!!!!!!!!اي.. هنعلق لنفسنا الرمانة وننط خلااص!

ومع الوقفة في الشمس في الصيف وبداية مرحلة الهلاوس  
البصرية وضربات الشمس ومتابعتك لسندوتشات الكفتة وهي  
متحزمة وبترقص على الشط.. والناحية الثانية كوبايات عصير اللمون  
نازلة الميه تدلع تملأ القل.. وعقلك الباطن بياكدلك إن لا حول













## الاعتراف السابع بحيا القرموط

اللي تابع عملية صيد كبير قراميط محافظتي القاهرة وحلوان  
إمبارح.. يقدر النهارده يعرف إيه اللي حصل مع القرموط اللطيف  
اللي أخذناه البيت بعد ما اصطدناه.

القراميط عموماً مش سمك عادي.. لا.. ده سمك روجه عالية..  
يعني بيتنفس جوه الميه وبره الميه.. ممكن تلاقيه قاعد معاكم على  
السفرة عادي.

القراميط سمك عشان تقدر تطبخه.. محتاج تعمل خطة بمساعدة  
مجموعة مجرمين عشان تموته الأول.

وغالباً الجريمة اللي بتعملها عشان تشويه بيكون ليها ضحايا..  
يعني كل أربعة عاوزين ياكلوا قرموط فيهم ثلاثة ييموتوا الأول.  
أبابا حبيبي بقى كان قمة في الذكاء.. قرر إنه مش هيدخل المعركة  
دي.. ببساطة قرر إنه مش هيموت القرموط.. وإنه عاوز يحتفظ بيه  
شوية معانا عشان يفضل يفكره بذكرى الانتصار العالمي وعودته من

النادي محملاً بأكاليل الغار.. ولما قلناله إن أكيد يعني مش هينفع  
نربي القرموط في البيت.. كان رده:

- إشمعنى إتم يا حيوانات بتجيبوا حيوانات تربوها وقالين البيت  
جينة حيوانات؟!

- أبابا أحبيبي.. إحنا بنجيب حيوانات مفيدة.

- التعابين والسحالي والتماسيح مفيدة يا حيوان؟!

- مش بالظبط أبابا.. بس برضه القرموط ده يعني مثلاً هيعيش  
فين؟ السرير مفيش فيه مكان!

- لا.. إحنا هنحطه في البانيو.

- بانيو؟! طب وإحنا؟ هنستحمى فين؟! دي ريحتنا ممكن تسبب

جمرة خبيثة لو ما استحمناش كل ربع ساعة!

- استحموا بالكوز.. كنت باستحمى كده في الجيش.

- يعني القرموط يسكن في البانيو وأنا أتجند؟!

- اخرس يا زفت!

- ماااي أورد رر تو ذا جد أبابا.. فروم هيم تو هيم.

ابتدى القرموط يتأقلم أول يوم في البانيو وهو قلقان.. إنما سريعاً

بعد مرور يومين.. أخذ على المكان بقى.. وابتدى يحس إن البيت

بيته.. وبعد يومين كمان بدأت حالات الزهق تجيله من الحبسة..

البانيو هو هو.. والقرموط كان عاوز يتفسح زي أماما بالظبط...

فابتدى يحاول الهروب من البانيو بقى.. خصوصاً لما كنا نبقى

قاعدين مرتاحين ٢٤ قيراط على التواليت.. في أروع لحظات التركيز

والتجلي.. يروح هووووب...







- خرج من البانيو ثاني؟؟

- أبابا هو بقى يدخل البانيو عشان يستحمى بس.. باقي الوقت قاعد بيتفرج على التلفزيون معانا.

- بطل استظراف يا حيوان وادخل نام!

- حاضر أبابا.. أول ما تنميلة رجلي تفك من الخضة هاقوم أنام ومفيش داعي لدخول الحمام.. البنطلون قام بامتصاص كل حاجة.

بعد كذا يوم ابتدى القرموط يحس بالوحدة.. واللي عارف القراميط كويس.. يعرف إن القرموط بالليل له صوت صفارة لطيف قوي شبه صرخة العفريت كده.. أصل أنا ناقص!

- يا شرييييييف.

- أيوه أبابا!!!!!!

- سكت القرموط مش عارفين ننام!  
- لسه حاكيه حدوته.. إيه؟؟ أخذه في حضني وأرضعه؟؟

- اتصرف يا حيوان! بقاله ساعة بيصرخ!

- ما أنا باصرخ من أسبوع بسببه يا ختا!!!!!!

- يا زفت كفاية تمثييل واتصررررف!

طبعا كنت باقوم أنا وإخواتي بالتناوب نفتح نور الحمام ونقعد شوية مع القرموط اللي ما كانش بيسكت غير لما نور الشمس يشأش.. وهنا بقى ابتدت أماما اللي ما نطقتش من ساعة ما دخل القرموط بيتنا تحس إن الطلاق مش فكرة وحشة للدرجة دي.. وإن أكيد ربنا

هيعوض عليها ويخلف عليها بناس تانية شبه البني آدمين اللي على  
كوكب الأرض.. لأن المخلوقات المقززة اللي عايشة معاها في  
البيت ما ينفعش يتقعد معاها أكثر من كده.

- شريف.

- أيوه أماما أحببتي.

- عارف الست بتاعة السمك اللي في السوق؟

- آه عارفها.

- انزل روحلها وقولها الحاجة أم شريف عاوزاكي تـ...!

- تدوريلها على عروسة للقرموط.. صح؟ هانتحر والمصحف!

- يا زفت قولها عاوزاكي تيجي تدبحيلها القرموط.

- يا نهار اسود! إنتي يئستي للدرجة دي أماما؟! ده الحيوان المدلل

بتاع أبابا.. ده ممكن يبيعنا فيها أعضاء بشرية.

- انزل بس واعمل اللي باقولك عليه.. أنا زهقت وعاوزة البانيو

خلاص!

- ما هو هيدبحنا فيه كده! تقومي تضحني بينا؟! إيه العيلة دي!

وتحت الإصرار.. جبت الست اللي أبدت إعجابها بالقرموط

وأبابا في الشغل.. وأجهزت عليه بعد صراع استمر نص ساعة لفظ

فيه القرموط أنفاسه ولفظنا إحنا كمان أنفاسنا عشان نمسكه.

أبابا رجع لقي القرموط صينية.. ولما حاول يحطنا في الصينية..

أماما فهمته إنه كان ييموت خلاص وهي لحقته وهو بيطلع في الروح..

ولأ نرميه؟؟؟ هااا؟؟؟؟



هيعوض عليها ويخلف عليها بناس تانية شبه البني آدمين اللي على  
كوكب الأرض.. لأن المخلوقات المقززة اللي عايشة معاها في  
البيت ما ينفعش يتقعد معاها أكثر من كده.

- شريف.

- أيوه أماما أحببتي.

- عارف الست بتاعة السمك اللي في السوق؟

- آه عارفها.

- انزل روحلها وقولها الحاجة أم شريف عاوزاكي تـ...!

- تدوريلها على عروسة للقرموط.. صح؟ هانتحر والمصحف!

- يا زفت قولها عاوزاكي تيجي تدبحيلها القرموط.

- يا نهار اسود! إنتي يئستي للدرجة دي أماما؟! ده الحيوان المدلل

بتاع أبابا.. ده ممكن يبيعنا فيها أعضاء بشرية.

- انزل بس واعمل اللي باقولك عليه.. أنا زهقت وعاوزة البانيو

خلاص!

- ما هو هيدبحنا فيه كده! تقومي تضحني بينا؟! إيه العيلة دي!

وتحت الإصرار.. جبت الست اللي أبدت إعجابها بالقرموط

وأبابا في الشغل.. وأجهزت عليه بعد صراع استمر نص ساعة لفظ

فيه القرموط أنفاسه ولفظنا إحنا كمان أنفاسنا عشان نمسكه.

أبابا رجع لقي القرموط صينية.. ولما حاول يحطنا في الصينية..

أماما فهمته إنه كان ييموت خلاص وهي لحقته وهو بيطلع في الروح..

ولأ نرميه؟؟؟ هااا؟؟؟؟

هو أبابا ما اقتنعش قوي إنما سكت قصاد إرادة ربنا.. مؤمن الراجل  
ده والله.. مؤمن لدرجة إنه صحانا الفجر ثاني يوم وقالنا:  
- يلاً.

- يلاً إيه أبابا ما خلاص.. اللي كنا بنفسحه الله يرحمه.. ربنا أخده  
بفضل الله.. اطلبه الرحمة!

- يلاً يا حيوان عشان أنا سألت وعرفت مكان في النيل مليون  
قراميط.. هنروح نصطاد هناك.

- يا ختااa

#قرموطي\_بجد

#بانيو\_فول\_بوررد

#إحنا\_خدمة\_التواليت\_سيرفس  
#اعمل\_سيشوار\_للقرموط\_يا\_زفت  
t.me/comicslink

#وباديكير\_كمان\_عيني

للقراءة (غبه) لا تنتهي







إنما أخويا الصغير قرر:

- عاوز أدخل الحمام أبابا.

- ما إحنا كنا فوق يا حيوانان!

- معلش أبابا ما جاتش غير لما نزلت.

- خديا شريف المفتاح اطلع طلع أخوك الحمام وإحنا مستنيين.

- أبابا مش قادر أطلع.. ولو نزلت الشماسي والكراسي

والسندوتشات والترامس ومضارب الراكات والكومودينو

وشامسيه النملية اللي شايههم دول مش هاعرف أركبهم على

ضهري ثاني!

- حظهم واطلع باقول يا حيوانان!

- حاطر as you wish أبابا.

طلعت فتحت باب الشقة.. أخويا دخل.. حطيت المفتاح على

الطرابيزة.. قتلته يخلص ويحصلني.. خرجت ونزلت.. دخل الحمام

قفل عليه ما عرفش يفتح.. الهوا هبذ باب الشقة والمفتاح جوه.. بقي

يوم إسود!

أبابا فاتح كرسي البلاج وقاعد وفاتح الشمسية.. ودي كانت أول

عيلة في التاريخ تغرز الشمسية في الأسفلت.. ومفيش على لسانه

غير جملة واحدة:

- مخلف حيواناااااات!

- أبابا اللي حصل ده مسألة حظ!

- ما هو حظي زفت إني خلفتكم أنا عارف!

- لا أنا باتكلم على الباب أبابا.. دي تراتيب ربنا!





آليسييه هوووب بقينا ماسكين في سور البلكونة من تحت.. آليسييه  
هوووب.. السلم وقع.. وبدأت الحفلة...

- يا ختا!!!!!!!!!!!!!!!!!!!!!! اي! الحقني أبابا!!!!!!!!!!!!!!!!!!!!!!

- قول لاخوك يمस्क كويس يا شريسييف.

- بتوصيني على إيه أبابا ده بنكرياسي في صوااابعوووو

يا ختا!!!!!!!!!!!!!!!!!!!!!! اي!

- خلي بالك لتقع يا حيوااان!

- كان نفسي أبقى في الخامس عشان الوقعة تبقى واحدة

يا ختا!!!!!!!!!!!!!!!!!!!!!! اي!

- حاول تتسلق السوووور يا شريسييف.

- إنت مخلف حرامي غسيل أبابااا! مش قادر يا ختا!!!!!!!!!!!!!!!!!!!!!! اي!

- استرجل شوية يا حيواااان اخوك بيصرخ جامد من الحمّام!

- على فكرة أنا ممكن أصرخ أجمد منه من البلكووونة

يا ختا!!!!!!!!!!!!!!!!!!!!!! اي!

- شد نفسك واطلع يا حيوااان ما تبقاش تافه!

- أبابا أنا بروحين دلوقت.. أنا وابنك اللي متشعبط.. ده أنا لو

حامل مش هابقي تقييل كده يا ختا!!!!!!!!!!!!!!!!!!!!!! اي هامووت!

وفجأة آليسييه هوووب.. إيدي فلتت نزلت أنا والمحروس

أخويا على كنية الشاليه الأرضي محدثين صوتًا موحدًا...

يا ختا!!!!!!!!!!!!!!!!!!!!!! اي!

الناس جريت علينا وقومونا وفهموا أبابا إنه حرام عليه اللي بيعمله

فينا ده.. لأن الصنف بتاعنا ده نادر جدًا ومش باقي منه غير إحنا الثلاثة



## الاعتراف التاسع خضار حصاوي

كل أسرة في الدنيا يبجي عليها وقت تبدأ فيه في الاعتماد على  
الذرية بتاعتها في الأعمال الأساسية.

ولأن ذريتنا في العيلة كانت من فصيلة الـ «حرام عليكى بقى أماما»  
لو طلبت مننا أي حاجة.. فده خلا مرحلة الاعتماد علينا تتأخر كثير..

والحمد لله رب العالمين انتهت الفترة دي بجملته «طلقني يا عبعزيز».  
طبعًا أبابا عمره ما كان بيسمع الطلب ده إلا في حالات الانهيار

العصبي شديدة الخطورة على الأرواح.. وكان بيضطر ساعتها يغير  
من تكتيك التعامل عشان يحافظ على كوابية الشاي اللي بيشر بها بعد

ما يصحى من نومة العصر.. وانطلق النداء:

- يا شريسييف.

- أفنظم أبابا.....

- هات الحيوانات إخواتك وتعالولي هنا.

- طاب أبابا هاشوفهم بيرعوا في أنهي أوضة وهنيجي.



- بسرعة يا حيوان!

- أوك.. ASAP أبابا.

جبت إخواني ووقفنا قصاد إمبراطور البيت وهو بيحاول يشرح لنا  
إن نظرية التطور بتقول في مجملها إن إحنا لازم نبطل نطلع الشجر  
وناكل الموز ونفلي بعض وكده.. وإننا لازم بقى نخش في مرحلة  
أكل البرسيم لأن العلف المستورد غالي وهو شايفنا مش مفيدين  
في البيت ده.

- إنتو هتنزلوا تشتروا لكم الخضار من السوق.

- حاضر أبابا.. هنروح نشترى السوق من الخضار حاضر.

- يا حيوان باقول خضار من سوووق!

- أبابا إنت بس محتاج تفسر يعني إيه سوق.

- حيوانات.. مخلف حيوانات! المهم.. هتنزلوا تشتروا الخضار

وما ترجعوش من غيره.. عيشوا في السوق لو ما جبتوش اللي

ألكم عاوزاه.

طبعا أماما استغلت الموقف ده الاستغلال الأسوأ في تاريخ

المساومات الحربية.. دي لو كانت ماسكة علينا صور ما كانتش

هتطلب الطلبات دي يا ختا!!!!!!!!!!!!!!!!!!!!!!! اي!

- أنا مش عاوزة حاجات كتير خالص.. أنا عاوزة بس بصل وقوطة

وخيار وجزر وبطاطس وشبت وكزبرة وبقدونس وخس وبتنجان

أحمر وبتنجان إسود وبتنجان أبيض وكرنب وقرنبيط وبامية

وبسلة وفاصوليا ولوييا...

- أماما إنتي بتلعي أتوبيس كومبيليه يا ختا!!!!!!!!!!!!!!!!!!!!!!! اي!







## الاعتراف التاسع خضار حصاوي

كل أسرة في الدنيا يبجي عليها وقت تبدأ فيه في الاعتماد على  
الذرية بتاعتها في الأعمال الأساسية.

ولأن ذريتنا في العيلة كانت من فصيلة الـ «حرام عليكى بقى أماما»  
لو طلبت مننا أي حاجة.. فده خلا مرحلة الاعتماد علينا تتأخر كثير..

والحمد لله رب العالمين انتهت الفترة دي بجمللة «طلقني يا عبعزيز».  
طبعا أبابا عمره ما كان بيسمع الطلب ده إلا في حالات الانهيار

العصبي شديدة الخطورة على الأرواح.. وكان بيضطر ساعتها يغير  
من تكتيك التعامل عشان يحافظ على كوابية الشاي اللي بيشر بها بعد

ما يصحى من نومة العصر.. وانطلق النداء:

- يا شريسييف.

- أفنظم أبابا.....أبأ.....

- هات الحيوانات إخوانك وتعالولي هنا.

- طاب أبابا هاشوفهم بيرعوا في أنهي أوضة وهنيجي.

- بسرعة يا حيوان!  
- أوك.. ASAP أبابا.

جبت إخواني ووقفنا قصاد إمبراطور البيت وهو بيحاول يشرح لنا إن نظرية التطور بتقول في مجملها إن إحنا لازم نطلع نطلع الشجر وناكل الموز ونفلي بعض وكده.. وإننا لازم بقى نخش في مرحلة أكل البرسيم لأن العلف المستورد غالي وهو شايفنا مش مفيدين في البيت ده.

- إنتو هتنزلوا تشتروا لكم الخضار من السوق.

- حاضر أبابا.. هنروح نشترى السوق من الخضار حاضر.

- يا حيوان باقول خضار من السوق!

- أبابا إنت بس محتاج تفسر يعني إيه سوق.

- حيوانات.. مخلف حيوانات! المهم.. هتنزلوا تشتروا الخضار وما ترجعوش من غيره.. عيشوا في السوق لو ما جبتوش اللي أمكم عاوزاه.

طبعا أماما استغلت الموقف ده الاستغلال الأسوأ في تاريخ المساومات الحربية.. دي لو كانت ماسكة علينا صور ما كانتش

هتطلب الطلبات دي يا ختاه!!!!!!!!!!!!!!!!!!!!!!

- أنا مش عاوزة حاجات كتير خالص.. أنا عاوزة بس بصل وقوطة وخيار وجزر وبطاطس وشبت وكزبرة وبقدونس وخس وبتنجان أحمر وبتنجان إسود وبتنجان أبيض وكرنب وقرنبيط وبامية وبسلة وفاصوليا ولوبيا...

- أماما إنتي بتلعي أتوبيس كومبيليه يا ختاه!!!!!!!!!!!!!!!!!!!!!!







# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه



















## الاعتراف الحادي عشر سيتها الأطفال

خروجت العيلة كانت دائماً بتبقى نشاط محبب لكل الناس  
الطبيعية.. يعني كل أفراد العائلة في كل مكان من كوكب الأرض  
بتستنى اليوم الأجازة أو اليوم اللي هتتجمع فيه العيلة عشان يخرجوا..  
وهيبه بقى.. وهيا بنا نلعب بتاع الأطفال.. وهيا بنا نمرح.. وكلنا عيلة  
ورحلة جميلة.. واحتفالات وكده.  
عندنا بقى في العيلة كان الوضع مختلف.. يعني تقدر تقول إننا  
كنا عكس كوكب الأرض كله تقريباً.. وده ليه بقى؟ أقولك أنا ليه..  
أبابا الله يرحمه كان بيحول ترتيبات أي خروجة بنحلم نعملها  
لمعسكر كشافة طالع يستكشف كعب الغزال يا متحني بدم الغزال في  
صحاري وادي دجلة.. أي تكدير والسلام.. معسكر تدريب صاعقة  
يتسم بالالتزام والتعذيب والتلذذ بالتعذيب.. وربنا يخليك أبابا مش  
عاوزين نخرج خلاص وحرّمننا والمصحف الشريف بلا جدوى.  
لحد ما أبابا نفسه زهق تقريباً من كل النظام ده.. وقرر في يوم



من الأيام يغير من النظام ده وياخدنا السينما.. لأول وآخر مرّة  
في تاريخ العيلة دي هنروح السينما سوا.. لدرجة إن أماما وقتها  
كانت شبه متأكدة إن دي غالبًا هدية وداع لطيفة من أبابا وهيطلقها  
ويرمينا في الشوارع كلنا حيث مكاننا الطبيعي زي ما أبابا كان  
طول عمره بيقول.

- يا شرييييييف.

- أفنظم أبابا.

- قول لإخواتك إننا هنروح السينما النهارده.

- سينما؟! هنروح نعمل إيه أبابا؟!

- الناس بتروح السينما تعمل إيه يا حيوان؟!

- إحنا مالنا ومال الناس أبابا؟! الناس بتروح السينما عشان تتفرج

على أفلام.. إنما إحنا علاقتنا بيك بتقول إنك أكيد تعاقدت على

تنضيف أرضية السينما وإحنا رايعين نكنسها!

- اخرس يا حيوان! إنتم كده ما بيظمرش فيكم حاجة!

- حاضر أبابا.. طب.. طب هنخش فيلم إيه؟

- صوت الموسيقى.

- إيه صوت الموسيقى ده؟!

- مفيش فائدة.. مخلف حيوانات و جهلة!

طبعا بعد ما أماما خلصت عياط من هول المفاجأة.. وإحنا لبسنا

واتأنتكنا.. أخذنا بعضنا هيلا بيلا وطلعنا بربطة المعلم أبابا هيلا هوب

على سينما «فونتانا» اللي عندنا في المعادي اللي ما كانش فيه غيرها

في الوقت ده.

السينما الصيفي الجميلة اللي كانت الناس بتشوف فيها كل أفلام  
السينما وقتها.. وكانت بتعرض أفلام محترمة وعالمية.. وما كانش  
وقتها فيه القرف اللي عايشين فيه دلوقت ده.

أبأبا قطع التذاكر ودخلنا بشياكة بقي.. وأبأبا صمم إن أماما تقعد  
جنبه وإحنا الثلاثة الإخوات نقعد في الطرف زي أي مجموعة من  
حاملي مرض الجرب البنغالي.

وزي أي ناس محترمة.. اشترينا فشار في الكيس الشفاف الرفيع  
ده اللي بيبقى فيه تسعناشر فشارا وشكراً.. وقعدنا مع بداية الفيلم  
وصوت جولي أندروز هيبتي يجلجل في السينما الصيفي.

لحد ما لفت نظري يا لهو بالي إن العيلة اللي قاعدة قصادنا معاها  
وغد عنده حوالي ستين أو ثلاث سنين.. أيوه إنت قريتها صح.. مش  
ولد.. وغد.. وغد في كل تصرفاته وملامحه ولفئاته ولبسه وتسريحة  
شعر راسه...

الست والدته شايلاه على كتفها وباصصلي.. وزبي أي طفل  
عامل بريء.. لأن مفيش حاجة اسمها طفل بريء في الدنيا..  
لقيته بيص للفشار اللي في إيدي.. فأنا بكل تلقائية أخذت فشارا  
واديتهاه في إيده.. جه ياكلها وقعت في الأرض.. وراح باصصلي  
ودمّع.

أنا قلت هيعيط.. والفيلم هيبوظ.. وأبأبا هيخرب بيت لحد رئيس  
حي المعادي كده.. قلت أتصرف.

رحت واخذ فشارا تانية ومبتسم ومادد إيدي وأكلتهاه في بُقعه.  
ودي كانت لحظة من اللحظات السودا الكثير اللي في حياتي

للأسف.. حظ أهلي وحش قوي.. مليش أنا في العيشة الطبيعية..  
تحس إن عمري مجموعة كوارث ملزقة في ديل بعضيها والله!  
الواد بلع الفشارة.. ولقيت عينه سبلت.. وفتح بُّقه.  
وعينك ما تشوف إلا النور يا ختنا!!!!!!!!!!!!!!!!!!!!!!اي!  
الفسارة طبعًا طبعًا طبعًا.. وقفت في زور الواد.. وابتدى يسوراً..  
والسر الإلهي ابتدى يطلع إلهي يطلع سري قبل ما أبابا ياخذ خبر  
يا ختنا!!!!!!!!!!!!!!!!!!!!!!اي!  
الولية أمه لقت الواد بيرفص في حضنها.. بصت عليه.. أخذت  
بالها إنه بينازع.. فابتدت تسوراً هي كمان.  
أبوه شاف الواد وأمه بيسورؤوا.. راح مسوراً هو راحر.. السينما  
كلها هتسوراً بسبب فشارة.. أحبييه!

جولي أندروز نفسها ابتدت تسوراً.. بتاع الفشار ابتدى يسوراً..  
والولية راحت فاتحة على الرابع على صرخة واحدة وأنا وراها وهي  
بتبصلي طبعًا ومش فاهمة:  
- ابنا!!!!!!!!!!!!!!!!!!!!!!اي!!

- يا ختنا!!!!!!!!!!!!!!!!!!!!!!اي.. ماله يا طنط مااله؟!

- ابنا!!!!!!!!!!!!!!!!!!!!!!اي يا ختنا!!!!!!!!!!!!!!!!!!!!!!اي!

- لا يا ختنا!!!!!!!!!!!!!!!!!!!!!!اي دي بتاعتي أنا معلش.

في ثانية الناس قامت.. وأبابا طبعًا ابتدى يتدخل بسرعة وهو  
شايف فيه حالة هرج ومرج.

- في إيه يا حيوانان؟ إيه اللي بيحصل؟

- الحقني أبابا ما دخل الأحداث في فشارة يا ختنا!!!!!!!!!!!!!!!!!!!!!!اي!











## الاعتراف الثاني عشر ملك الجن اتحرق

كنا شلة حلوة قوي.. عمري ما أقدر أنسى مواقفنا وحواديتنا..  
لأن مواقفنا وحواديتنا ما تتنسيش.. زي كل واحد فاكر حواديت زمان  
الحلوة مع أحلى شلة من صحابه.  
هانسى إزاي؟ هانسى الحكاية السوداء اللي ها حكيكم عليها دي  
إزاي؟! ده أنا باقوم بالليل مخضوض بسببها لغاية دلوقت.  
المهم...

في ليلة صيفية حالكة السواد.. من تلك الليالي اللي بتبقى في الأجازة  
الكبيرة بتاعة الصيف.. وما أدراك ما الأجازة الكبيرة بتاعة الصيف.  
لعب وجري وجد وضرب.. حالة من الخروج اللاإرادي طول  
الصيف.. بين الشارع والنادي واللعب والتنظيف.  
وأنا راجع من النادي على المغرب كده.. قابلوني شلة الأصدقاء  
عشان نكمل لعب في الشارع.. طبعاً اللي قديم زي حالاتي فاهم  
كويس قوي معنى كلمة «لاجئ» في الشارع أيام الأجازة.

- شريف.. يلاً تعالى عشان هنلعب لعبة وناقصنا واحد.  
- الله.. أنا باحب اللعب قوي.. يلاً.. ها؟ هنلعب إيه؟ كهربا شد  
الكوبس؟

- لا.. إحنا هنلعب لعبة جديدة.

- إيه؟ هنلعب كهربا شد الكوبس الجديد؟!

- لا.. مش كهربا خالص.. هنلعب «ملك الجن اتحرق».

- الله.. يخرب بيوتكم!

- إيه بس يا شريف؟!

- لا يا حبيبي مفيش.. بص أصل أماما عاملا لي سندوتشات بيض  
مسلوق بالقوطة ولازم أكله سخن عشان أتعشى.. العبوا انتو  
وأنا هابقى أخلي بالي من أشلائكم إن شاء الله!  
- يا شريف دي لعبة حلوة قوي.

- آه ما هو باين من الإسهال اللي جالي أول ما سمعت اسمها.

- طب بص.. تعالى كمل العدد معانا ولو ما عجبتكش ما تكملش.

- وبالنسبة لملك الجن اللي هيلع ده.. مكمل معانا ولا أنا هاطلع

لأبأبا كما يتمنى داعياً دائماً في صورة جثة هامدة؟!

- تعالى بس.

طبعا بعد مليون مصحف مني إني مش لاعب.. ومليون كعبة إني

ما هاكممل لعب.. ومليون ختمة شريفة إني لازم أروح البيت.. رح

معاهم عشان نلعب اللعبة قصاد البيت عندهم.

اللطيف في الموضوع إن النور اللي قصاد البيت عندهم يا دوب

يخليك تشوف إن ده بيت أساساً.





- تعالى بس عشان صحابنا قالولنا إنهم عملوها ونجحت.  
- اللعبة تنجح وأنا أسهل؟ ما ان شالله ما اتهببت نجحت!  
طبعا بعد اتنين مليون مصحف إني مروح.. واتنين مليون كعبة  
إني مش هاكمل.. واتنين مليون ختمة شريفة إني ما هاعرفهم تاني..  
لقيت نفسي قاعد على قرايصي عشان أشاركهم الزفتة اللعبة.. وخالد  
اتزفت غير مأسوف عليه على الأرض.. وإحنا قعدنا حواليه.. وأيوه  
حطينا صوابعنا.. تحت كتفه وجزمته وراسه.. وابتدينا نوشوش بعض  
بصوت واطي في ودن كل واحد:

- ملك الجن اتحرق.

- يا ختنا!!!!!!!!!!!!!!!!!!!!!!!!!!!!!!اي!

- ملك الجن اتحرق.

- الله يرحمه!

- ملك الجن اتحرق.

- عشان يحرم يلعب بالكبريت!

- ملك الجن اتحرق.

- يحرق اليوم اللي عرفتكوا فيه!

طبعا في اللحظات السوخة اللي زي دي.. بتبقى إنت عارف إن  
في مصيبة هتحصل.. وصحابك عارفين إنك عارف إن في مصيبة  
هتحصل.. وخالد عارف إن صحابك عارفين إنك عارف إن في  
مصيبة هتحصل.

المصيبة مسألة وقت مش أكثر.. أفلام الرعب اللي بتتبني على  
المنطق ده ما جاتش من الفراغ يا جماعة.. بيخشوا بيت العفريت









## الاعتراف الثالث عشر سندوتشات وأشياء أخرى

«البسطرمة في الأحمر.. والمربى في الأخضر.. والحلاوة في البني».  
ده كان الهتاف اليومي اللي بنرده أنا وإخواتي لما قررنا ننافس  
شركة أمريكانا ومنتشر في السوق بقي.. وبتحول لرأسماليين جشعين..  
ونبتدي نعذب العيال اللي كانت بتغلس علينا في الشارع ونكبر  
ونضربهم والجوده.

وقررنا نبدأ من الصفر.. أو عشان نكون أكثر وضوحًا.. من تحت  
الصفير بشوية كده.. وعشان برضه أبقى أمين معاكم.. قررنا نبدأ من  
تحت الكنبة اللي عندنا في البيت.. اللي كانت مقر عمل المشروع  
بتاعنا.. عشان نعمل سندوتشات ونبيعها للعيال صحابنا في الشارع  
ونكسب ومنتشر زي ما قتللكم.

المشروع زي أي مشروع ناجح.. ابتدى صغير.. ما رضيناش نكبره  
لأن تحت الكنبة عندنا ما كانش يستحمل صواني جلاش ولا حلل  
محشي ورق تواليت.

ابتدى بتلات أنواع سندوتشات بس.. يعني قلنا عشان وزارة  
الصحة برضه ما تملكش معدات حجر صحي كفاية تقدر تحتوي  
التلوث اللي ممكن نعمله في ضاحية المعادي لو المشروع باظ  
والدنيا خربت مننا.

وكان طبعًا من أهم مميزات المشروع.. الماركيتينج.. والجزء  
الخاص بالباكينج.. أو التغليف زي ما يقولوا.

ودي كانت مهمة خاصة لرؤساء مجلس إدارة المشروع.. أيوه  
كلنا كنا رؤساء مجلس إدارة ومحدث رضى يبقى عضو مجلس أو  
موظف عادي.. شركة ليها تلات رؤساء مجلس إدارة كانت الأولى  
من نوعها في الشرق الأوسط.

اخترنا ألوان مناسبة جدًا لأنواع السندوتشات الثلاثة بقى:  
البسطرمة.. اختارنا نلفها بشكل شيك في جلاد أحمر.  
المربى.. قررنا إنها تتحط في لفة روعة بجلاد أخضر.  
أما الحلاوة عشان بتقع.. فقلنا نحطها في جلاد بُني.  
وزي ما انتو ملاحظين.. مفيش أي علاقة بين سندوتش المربى  
واللون الأخضر للجلاد.. الحكاية كلها إن الجلاد الأخضر كان  
رخيص مش أكثر.

وبعد مرحلة الباكينج.. كان في مرحلة نقل النفايات.. قصدي  
السندوتشات.

ودي كنا بنستخدم فيها أكياس سودا كبيرة بتاعة الزبالة عشان  
محدث يشوف إيه اللي جواها والمشروع بتاعنا يتكشف.. ويتقلد..  
ونخرج من المولد بلا حمص.

طبعا أبابا شافنا وإحنا شايلين كيس الزبالة الأسود وهو مليون  
سندوتشات كان هيطب ساكت وهو بيسأل:

- إيه اللي إنت شايله ده يا شريف؟!

- دي عربية السندوتشات بتاعتنا أبابا بس من غير عجل.

- إيه يا حيوان ده مش فاهم؟!

- أبابا دي سندوتشات هنييعها لصحابنا عشان نبدأ أول خطوة في

طريق القضاء على الشعب ده!

- يا خبير إسود ومنيل! هتجيبولي مصيبة يا حيوانان!

- غيرنا أبابا؟! صعب.. اطمن.

طبعا أبابا فتح باب البلكونة وتوجه إلى السماء متضرعا إن ربنا

يستره وما يفضحوش.. ولو في إمكانية ياخذنا يبقى يا ريت.

وإحنا أخذنا السنجروتشات بقى وانطلقنا لنشر الفيروس.. قصدي

ننشر الخبر الصبح مع صحابنا اللي رايعين المدرسة.. والناس

اتبسطت.. بجد.. وبدأت الأسطورة تتحقق.. إقبال غير طبيعي على

سندوتشات الإخوة الثلاثة.

العيال في الشارع بقوا مدمنين سندوتشات.. وابتدوا يقفوا على

النواصي يهرشوا من قلة البسطرمة.. وسمعنا عن محاولات انتحار

بعد انتهاء سندوتشات الحلأوة.. أما المربي بقى.. فكان ليها مجاذيب

ماشية في الشارع بتكلم نفسها.

نجاح منقطع النظير.

جالنا طلبات عظيمة.. وابتدينا نكبّر المشروع بقى.. فقررنا نطرد أماما

من المطبخ ونطالبها تروح تطبخ في البانيو عشان ما تبوظلناش الشغل.





ربنا.. الراجل بتاع المكتبة بطل بيع كتب وكراريس وأقلام  
ومركز في الجلابد بس.. الراجل اغتنى خلاص من الجلابد  
اللي سحبناه.

- ممكن نحط البسطرمة في جلابد لون تاني ونكتب عليها بسطرمة.  
- برافو عليك يا وائل.. برافو.. نفذ فورًا مفيش وقت.. جحافل  
الطلبة بتطالب بكميات إضافية من البسطرمة ولازم نوفي  
احتياجاتهم بدل ما يتحولوا لتعالب سواحيلي.  
طبعا البسطرمة اتلفت في جلابد المربي.. والحلاوة اتلفت في  
جلابد الدراسات.. والرومي اتلف في جلابد السانيس.. والدراسات  
اتلفت في جلابد السلطان ويا ختنا!!!!!!!!!!!!!!!!!!!!!! اي!  
تهت.

تهت يا ختنا!! اي!  
وما بقتش عارف مين جلد إيه فين أنهي طفححححح  
يا ختنا!! اي!  
وتحولت مسألة الطلبات المنظمة بقى إلى طاسات بزرميط  
بالبيض.. ابتدينا نوفي طلبات الصبح بقى بالويم كده.. كل واحد  
وقدره.

- حضرتك طالب إيه؟

- بسطرمة.

- أخضر يا وائل.

- خلص الأخضر أشريييف!

- بُني أو اائل .. هات أي لون شكلنا بقى وحش!  
- في بُني .. بس بايت من أول أول إمبارح .. تاخذ؟  
- مد إيدك بس طلع أي لفة من كيس الزبالة .. وحاول تشوف  
كيس زبالة طازة!  
وطبعًا التلاميذ المساكين أخذوا السندوتشات وراحوا المدرسة  
فرحين بما آتاهم الله من فضله وإحسانه .. غير عابئين بالكارثة الكونية  
اللي مستنياهم جوه الجلاد...  
بقايا السندوتشات اللي ما كانش حد بيشتريها .. كنا بنكومها تاني  
في أكياس الزبالة ونرجعها البيت .. ونقول إننا هنبيعها تاني يوم ..  
مش هيجرى حاجة يعني .. إنما يوم ورا الثاني ورا الثالث .. تراكمت  
السندوتشات .. وقدمت .. وباظت .. وعفنت جوه الجلاد .. وخلقت  
نوع من أنواع الحياة الجديدة .. وخصوصًا البسطرمة اللي كان هيخرج  
منها تنين بتلات رؤوس من كتر ما باظت .  
مفيش يا جماعة .. مسافة أربع ساعات زمن .. كانت أعراض  
الجمرة الخبيثة انتشرت في المدرسة عندنا ..  
وانفجرت المجرررة يا خت!!!!!!!!!!!!!!!!!!!!!!اي .  
اللي كان عنده حساسية من البسطرمة واخذها على إنها حلاوة ..  
ما شاء الله عليه .. ورم .. وبقي عبارة عن وش وطالعله شوية جزم .  
واللي جاله إسهال من الحلاوة البايطة بقالها أسبوع لدرجة إنه  
كان قرب يسهل من بُّقه .  
واللي جاب عصارة معدته في الأرض من طعم مربى التين







## الاعتراف الرابع عشر مجنون المنيرو

المرّة الوحيدة اللي قدرت أقنع فيها أبابا إننا ما ناخذش العربية  
عشان مشواره في وسط البلد.. وإننا ناخذ المترو.. وهو الله يرحمه  
ما كانش بيعبه عشان الزحمة.. كانت مرّة سودا سواد جالوص الطين  
على ملاية بيضا.

المرّة دي بعد ما أبابا اقتنع.. ونزلنا أخذنا تاكسي لحد محطة المترو..  
وقطعنا التذاكر ودخلنا ورحنا وقفنا وركبنا عربية المترو.. طلعت العربية  
الحمد لله فاضية جداً.. يعني تقدرنا نقولوا كان فيها حوالي تسعة مليار  
شخص بالإضافة إلى تسعين في المية من باقي مخلوقات الكوكب..  
الناس كانت مرسومة على أبواب العربيات من الزحمة.

تحسوا إن ربنا حقيقي حب يعاقبني إني أقنعت أبابا بالمترو.. بس  
أنا كان غرضي خير والله.. بعيد عن زحمة الشوارع والعربيات..  
بس للأسف جت في وشي وطلع فيه زحمة بشر جوه عربية المترو.  
وإحنا واقفين جوه العربية وبنحاول نمسك في أي حاجة أو أي  
حد عشان ما نقعش لما المترو يتحرك.. لقينا من بعيد الناس بتوسع..

بيعدوا عن حاجة جاية من بعيد.. بتخترق الصفوف في صمت..  
صمت مرعب بيخليهم يبعدوا لوحدهم تلقائياً!  
طبعاً أنا كنت قصير أوزعة مش شايف حاجة.. إنما الرعب اللي  
كان على وشوش الناس في المترو ساعتها خلاني أكون على يقين  
إن اللي جاي ده غالباً يا إما الأشكيف بتاع شريهان.. أو على الأقل  
الأستاذ عادل أدهم.  
لكن ياريتة طلع الأشكيف.. أو طلع حد برحمة الأستاذ عادل أدهم.  
طلع مجذوب.. أيوه.. مجذوب من النوع الأصلي.  
طلع واحد مجذوب لابس هدوم الإنسان الأول.. ومش قصدي  
الإنسان الأول إنه لابس هدوم قليلة.. لا خالص.. الإنسان الأول هنا  
المقصود بيه إنه غالباً أول واحد لابس هدوم ومن ساعتها ما قلعهاش..  
دي بقى كانت هدومه.. طبعاً ما اتغسلت من يوم ما اتحطت على جتته..  
وطبعاً شعره طويل وأبيض ومنكوش وملفوف لا واليو لا واليسيو...  
جسمه بقى عجب العجاب.. أعتقد ممكن تقعد تلف فيه أسبوع  
عشان توصل للفانلة الداخلية بتاعته أساساً.  
الراجل ده بقى سبحان من أبدعه.. ساب خط حلوان المرج كله..  
وجه عشان يقف جنبنا.. أيوه.. في الحتة اللي إحنا واقفين فيها.  
طبعاً أبابا بصله.. ومناخيره اشمازت جامد من الريحه الفواحة  
المحترمة اللي طالعة منه.. وراح باصصلي بصة طويلة خالية من أي  
تعبير إلا القرف.. وراح تافف في وشي.  
أيوه تف في وشي أنا.. ما طبعاً يعني.. أنا السبب.. حقتك أحاج..  
أنا جزمة بُني ٤٢ برباط.















## الاعتراف الخامس عشر بيكاسو إبراهيم دافنشي

في فترة من فترات حياتي وأنا صغير.. ابتدت مشاعري تكبر  
وتترعرع وتتحول للون الفشفشاني.. اللي هو بين البمبي المخضر  
والروز المنقط أصفر ده.

وابتديت أبقى وقتها مخلوق وحيد الخلية متدفق المشاعر.. مشاعر..  
تشاور إيفري وير.. بادلوق مشاعر على فانلتي الداخلية بدل الريالة.  
عايش في دور الإنسان الطيب الوغد الحساس.. ما تفهمش إزاي  
بس أقصد مشاعر كثير متضاربة.. وبقيت باستخدام مناديل كيلينكس  
بديلاً عن المسح في الكم وشغلانة...

في الفترة دي بقي.. قررت إني هاغير من العالم.. أيوه يا جماعة أنا  
ربنا خلقني عشان أكون مصدر إلهام للناس.. لا مش إلهام شاهين..  
إلهام اللي هو باعمل حاجة بديعة.. لا برضه مش بديعة العالمة..  
أقصد إني لازم أكون فنان.. يتحاكى العالم عن فنه وإحساسه ومشاعره  
المرهفة اللي مليانة ريحة معفنة دي.

قررت أجرب في كل فنون المشاعر.. أطلع شاعر.. أو أطلع رسام.. بس ثواني كده.. ليه ما ابقاش الاتنين في بعض؟  
أيوه.. هي دي يا جماعة.. أنا قررت أبقى مفعم بالأحاسيس  
وأتحول لرسام مشاعر.. الله عليا وعلى سنيني المعمصصة.  
كنت وقتها حزين جداً على تاريخ بيكاسو اللي هيتمسح بأستيكة  
بعد ما تغزو لوحاتي العالم.. أو تقضي على الناس اللي عايشة فيه  
أيهما أقرب.

وكنت مشفق على ليوناردو دافنشي اللي بيعجي ويمشي ده.. لما  
يقرروا ينزلوا لوحة الموناليزا يرموها في التواليت.. ويحطوا مكانها  
صورة «باتعة جيزة» اللي قررت أرسمها وهي بتجري ورا عربيات  
الرش في الشارع.. وعيناها الحولتان تسببان تسمماً دمويًا هارياً  
لكبد كل من شافها ولا قرأش المعوذتين.. هتبقى فشر رأس ميدوسا  
مرسومة.. تحفة إسهالية مفزعة.

في المجمل كنت قررت ونفذت وابتديت خلاص.. اشتريت  
ألوان ميه وألوان زيت وألوان فحم وألوان فلوماستر وألوان خشب  
وألوان بلاستيك وورق وقماش.. وابتديت أوزع لوحاتي في البيت  
وأعلق القماش على التلفزيون وأرسم.. أعلق القماش على البوتجاز  
وأرسم.. أعلق القماش على إخواني وأرسم.. أعلق القماش على  
المكتبة وأرسم.

أرسم وأرسم وأرسم وأرسم...

أرسم وأقول شعر فصحي أو عامية عشان الإحساس بالوجع  
يتملكني وأقدر أبداع.. وعشان الوحي ينزل عليا.



- حيوان!

استمرت الفترة دي كذا أسبوع.. وكنت ابتديت بقى أبطل حاجات  
كثير...

أبطل أستحمى.. أبطل أسرح شعري.. أبطل أغسل وشي.. أبطل  
أنضف الشقة من الجراثيم اللي بارسمها.. أبطل أرد على إخواني ترفعا  
وسموا بروحي المحلقة في ملكوت أكياس الزبالة اللي ورا باب المطبخ.  
كنت ابتديت أخلص كل القماش وأرسم على تيشرتاتي بقى  
وتيشرات إخواني.

وفي يوم جاني الوحي وقمت سحبت قماشة وقعدت أليط فيها  
فوق الأربع ساعات بألوان الزيت والشمع والميه لما بقت شبه مساحة  
رجل سيد قشطة وهو طالع من الطين.  
لحد ما لقيت أبابا بينده:

- محدش شاف الجلاية البيضاء بتاعتي يا غجررر؟!  
- إيه؟! لو كس لايك أحيه بالملبن!! وأنا باقول بيني وبين نفسي  
دي زراير إيه؟! يا ختا!!!!!!!!!!!!!!!!!!!!!!!!!!!!!!  
- الجلاية البيضاء بتاعتي فيين يا حيوانات?!  
دي بقى بتبقى المرحلة اللي الوحي فيها بيخلع ويقولك سلام  
يا نجم أنا مش معاك في النصيبة دي.. أبوك هينفخنا كلنا.  
خووود.. خووووووود يا وحي.. ولا!!!!!!!!!!!!!!  
- الجلاية فين يا شرييييييف?  
- بيت شعر أوله راء.. رؤوس قد أينعت وحن وقت ضربها  
بالجزمة.. هتموت فطيس يا اللي ملكش لازمة.





# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه



الاعتراف السادس عشر

## أنور وجعفر

«أنور وجعفر هيقعدوا معانا ثلاث أيام».

ده كان الخبر الأحول اللي أبابا قرر يزفه لنا في أجازة الصيف  
مقرونًا بوصول أونكل وجدي أبو أنور وجعفر وحده ليهم في وشنا  
والتزول جري عشان هيسافر بلدهم عنده حالة وفاة.

طبعا للتوضيح.. أنور وجعفر.. توأم فضائي.. مش مخلوقات  
أرضية.. أنور وجعفر في حد أول ما اتولدوا قالهم على سبيل  
الراحة: «كبروا دماغكم».. فهما فهموا الحكاية غلط ودماغهم  
كبرت فعلا عشان ييقوا عبارة عن دماغ ونازل منها شوية أعضاء  
تنتهي بجزمة.

أنور وجعفر كانت عينيهم ضيقة لدرجة إنك تفتكر إن في حد  
حفرها في وشهم بسن قلم رصاص.. وما كانش ليهم بق أفتكر..  
كانوا بيتغذوا عن طريق الامتصاص زي أخطبوط الشعاب المرجانية  
الموكوسة.

أنور وجعفر ما كانوا يتكلموا.. ولا يشاوروا.. كانوا بيتنحوا  
ويبصوا بس.

- تاكل يا أنور؟

صمت مع تنيح.

- جعفر جعان؟ أحطلك أي هلام تشفته؟!

صمت مع تنيح.

- أنور تلعب كورة؟

صمت مع تنيح.

- طب ممكن نستلف دماغك نلعب بيها كورة؟

صمت مع تنيح.

طبعا الساعتين الأوائل من التعرف على أنور وجعفر حملت كم  
من الأسئلة مني ومن إخواني تشجع على الانتحار.. خصوصا في  
وجود أبابا للترحيب بالتوأم:

- أبابا هو ده اسمه جعفر إزاي؟!

- بس يا حيوان.. هو اسمه كده!

- أيوه يعني يشعر بياه وهو بيجعفر؟

- يا زفت اسكت.. عيب كده.. ضيوف!

- لا أبابا دول إليانز مش ضيوف.. دول كشافة قبل نقطة الصفر

واحتلال الكوكب!

- اخرس يا حيوان باقول!

- حاطر أبابا.

- إياك حد فيكم يزعلهم.. هاضربه بالجزمة ستين!















- من بكرة الصبح مش هتقعد في البيت.
- هتطردي؟ هتطردي أبابا؟ ليه كده ده أنا باحبك؟!
- هتنزل تشتغل يا حيوان!
- آاه.. بس إنت عارف أبابا مفيش شغل في البلد!
- هتروح كافتيريا بتاعة أونكل صالح تساعده.
- مين أونكل كافتيريا ده أبابا؟!
- يا حيوان باقول كافتيريا أونكل صالح!
- آاه أيوه أيوه.. معلش.. وده بيعمل إيه في الكافتيريا؟
- هتروح وتشوف.. أنا اتفقت معاه خلاص.
- ده على أساس إنك باعت جيبة على شماعة أبابا؟!
- أيوه.
- حاطر أبابا.

طبعا اضطريت زي أي عبد إسود أسمع الكلام.. لأن رسائل تهديد أبابا بحذف إخواني من البلكونة وتشريد أماما في الشوارع كان ليها أثر مخيف على نفسي كالمعتاد.

ركبت مواصلات ووصلت كافتيريا أونكل صالح.. ودخلت عليه طبعا بابتسامتي اللي شبه ابتسامة عصفور الخناريا.. وكانت أول مرّة نتقابل:

- صباح الخير يا عمو.
- صباح الخير يا حبيبي.
- عندكم إيه هنا بقي؟
- إنت ماما بعثاك تجيب إيه؟!

- لا.. أنا أبابا اللي باعتني بصراحة.

- باعتك تجيب إيه؟

- أجيب ضرفها إن شاء الله.

- نعم؟!!

- لا باهزرر.. أنا شريف اللي أبابا كلم حضرتك عليه إمبراح عشان الشغل.

- آه... أهلاً أهلاً.. إزيك يا حبيبي.

- أهلاً يا عمو.. هو ده المحل؟!!

- أيوه.. والمطبخ جوه.

طبعاً أخذني جولة لطيفة في المحل اللي مساحته كلها على بعض أربعين متر.. عبارة عن واجهة وفي الخلفية مطبخ وشكراً جزيلاً.

بصراحة ده كان أقل من طموحاتي بكثير.. لكن مفيش مانع إني أبتدي أخطط أسيطر على المحل شوية بشوية.. وإني أقنع عمو صالح إنه يوسع أفقه ومداركه ويبتدي يمضي كمبيالات على بياض وياخد محلين جنب المحل ده.. ويكبر بقى وبعدين يتعثر وما يعرفش يسدد ويتحبس.. وأنا أورث عمو صالح فوراً.. وأبتدي على نضافة.

كل ده عدى على دماغى وعمو صالح بيشر حلي إني هاكون مساعد الحاج سعيد اللي بيشتغل بقاله خمس سنين في المحل سبع أيام في الأسبوع من غير يوم أجازة واحد.

وطبعاً أول ما الحاج سعيد لمحني.. بقى سعيد فعلاً.. وطلب أجازة من عمو صالح لمدة أربعة وعشرين ساعة بس يروح يموت فيهم وييجي.

إنما عمو صالح كان رافض طبعًا.. والحاج سعيد أكدله إن الحكاية سهلة.. وإن شريف أكيد أكيد هيقدر يسد.

- مش كده يا أستاذ شريف؟

- نعم؟! أوامر يا حاج سعيد؟

- مش حضرتك هتقدر تمشي المحل الكام ساعة دول؟

- لا هو في الحقيقة إنت ممكن تاخذ أجازة أبدية.. لأنني بافكر

أغيرك تمامًا وأستعين بمجموعة من الطبائحات المتعلمات.

- أهوووويا صالح بيه.. أستاذ شريف سداد أهو.

وتحت الإلحاح وافق عمو صالح على الأجازة ليوم واحد فقط..

بداية من بكرة.. وأنا قضيت اليوم ده وأنا باقيس أبعاد المطبخ كويس

منعًا للاختناق.

تاني يوم الصبح.. بكل هممة ونشاط.. وتحت نظر أبابا شافني وأنا

نازل رايح الشغل مع عمو صالح وكان سعيد جدًا بحماسي.. وصلت

الكافتيريا.. كانت ساعة فطار بقى والناس ابتدت تهل عشان تطلب

أكل.. وعمو صالح واقف بره على الكاشير:

- شريف.

- يبييس سيبيير.

- واحد بطاطس كبير وتلاتة بطاطس صغير.

- إيه البطاطس دي؟!!

- نعم؟!!

- لا لا باهزر.. هاهاها.. تلات دقائق وهتكون جاهزة.

طبعًا لطم مستمر في المطبخ.. بطاطس؟! إحنا ما اتفقناش على



كده.. أنا ممكن أسلقلهم بيض.. أعملهم سندوتشات جبنة بالقوطة..  
أحط غسل بطحينة في طبق.. أسخن عيش بلدي.. إنما بطاطس!  
ده كان تخصص أماما وياما شفت النار ماسكة فيها بسبب البطاطس  
أساسًا.. وأنا معنديش وقت أتحرق خالص.

- يا شرييييييييف.

- ييييييس سييييير.

- البطاطس خلصت؟!!

- مومتس سييييير.. بادور على الزيييت.

- بسرعة الناس مستعجلة.

طلعت الطاسة الكبيرة اللي كان الحاج سعيد قال عليها.. وحطيت  
فيها إزازة زيت.. وفتحت عليها النار على الآخر عشان الزيت يسخن  
بسرعة.

طبعا أماما بعد كده فهمتني إن الزيت كان لازم يتوطى عليه وأنا في  
قسم الحروق في مستشفى المبرة ومش باين مني غير فتحة مناخيري.  
دورت على كيس البطاطس.. يمين.. شمال.. مفيش.. طب  
وبعدين؟! الحاج سعيد عملها ولا إيه؟! فين البطاطس؟ فييين؟  
مستقبل المحل.. مستقبلي المهني على المحك يا غجر.. أين  
البطااااطس?!!

- يا شرييييييييف.

- ييييييس سييييير بقى ما تزنشششششششش!

- البطاط...!

- باقطعها.. باقطعها إلهي ينقطع خبركم يا ختااااي!





اللي الدخان بتاعها ملا المطبخ.. لحد ما واحد ابن حلال من  
المحلات المجاورة جه ومعاها طفاية حريق كيماوي كبيرة.. وأنقذ  
الموقف في ثواني.

شالوني مربعن.. هيللا بيلا.. في حالة إعياء.. خرجوني بره لكي  
أشم هواءً نقيًا.

عمو صالح لف في المطبخ عشان يعاين الخسائر.. وخرج بعد  
ربع ساعة عشان يشوفني.. بس أنا كنت ساعتها وصلت البيت بقي..  
طبعا هي مسافة نص ساعة وكان أبابا في البيت.. بعد ما كلموه  
في الشغل وقالوله إن «حريق كبير يلتهم مطعم شهير في المعادي  
بسبب حيوان».

أبابا وصل البيت.. ودخل.. لقاني باعمل كمادات تلج على  
مناخيري من ريحة الدخان.

- البقية في حياتك أبابا في عمو صالح.. كان راجل طيب.. وربنا  
يوفق الحاج سعيد في شغل جديد إن شاء الله!  
- إنت إيه اللي عملته ده يا حيوان؟؟!!

- دي إرادة ربنا أبابا.. المطعم ما كانش مجهز بففاير سيستم..  
وعمو صالح راجل مؤمن.. وأكد الناس هتعطف عليه وهتشغله  
سايس ولأ حاجة.

- عمك صالح كلمني في التلفون.

- بركة إنه لسه عايش ما اتجلطش.

- مستنيك بكرة الصبح عادي.. الموضوع طلع بسيط.

- مستحيل يوافق يشغلني تاني أبابا.. إنت أكيد بتهزر!







- يا شريسيشيسيسيسيسيف.

- أفنظم أبابا.

- هو إنت مش بقالك شهر بتقول عاوز تروح الجيم؟

- آه أبابا.. بس الجو حر بقى ومش ناقصة فرهطة.

- إيه الدلع ده يا حيوان؟! اجهز.. بكرة هنروح سوا.

- معقول؟! هتوصلني بنفسك أبابا؟!!

- لا.. هاروح معاك عشان أشجعك يا بني آدم.. وهنلعب سوا.

- هار ازرق!! ليه كده أبابا؟! ليه تدمر لعبة كمال الأجسام في

مصر؟؟

- اخرس يا حيوان!

طبعًا كانت فكرة من الأفكار التي تتشع بالسواد.. أبابا غالبًا هينكد

على المنطقة اللي فيها الجيم كلها.. ده هيقى يوم من الأيام اللي

هيتذكرها تاريخ اللاعبين الفطاحل في رياضة رفع الجرادل أكيد.

وطبعًا.. ولأن أبابا من النوع اللي بيصحى بدري.. كنا في الشارع

الساعة الثامنة صباحًا.

طبعًا حاولت أفهمه إن صالات الجيم ما بتفتحش قبل اتناشر

في أي منطقة طبيعية في جمهورية مصر العربية.. إنما أبابا قال إن ده

مستحيل.. وإن العقل السليم في الجسم السليم.. وإن أفضل رياضة

بتبقى رياضة الصباح الباكر.. زي ما كان بيحصل في تدريبات الصاعقة

في الجيش على أيامه.

النتيجة إننا فضلنا منتظرين من الساعة ٨:٣٠ إلى الساعة ١١

صباحًا لحد ما عمال الجيم اللي بينصفوا وصلوا.. وطول المدة دي

















## الاعتراف التاسع عشر توب سيين .. وتوب علينا يا رب

في سنة ألف تسعمية تسعة وتسعين .. كان فيه حدث مش طبيعي .  
في السنة دي تم افتتاح مدينة دريم بارك للألعاب .. ملاهي عملاقة  
كانت الأولى من نوعها في مصر والوطن العربي .  
وعلى فكرة مش ده الحدث المهم خالص .. الحدث ساعتها إن  
أبأبا قرر إنه نفسه يروح الملاهي دي .  
أيون .. أبأبا قرر يستعيد ذكريات طفولة زمان ومولد السيدة زينب  
ويروح الملاهي اللي بيشفوف إعلاناتها في التلفزيون .  
وده كان الحدث .. الحدث الأسود في تاريخ العيلة وتاريخ  
الملاهي نفسها .. غالبًا لولا ستر ربنا كان هيبقى افتتاح وذكرى تأبين  
للعاملين في المدينة العملاقة .  
طبعا كل محاولتنا لإقناع أبأبا بالعدول عن رأيه وإننا ممكن نروح  
لوحدنا عشان ما نتعبوش .. بآءت بالفشل الذريع .  
وانتهى الموضوع إلى إننا بنركن في الباركن بتاع دريم بارك

اللي مصر كلها رايحة في أول أسبوع افتتاح ليه.. واللي كان زحمة لدرجة إننا تقريباً ركنا في البيت واتمشينا لحد البوابات اللي كانت أبعد من بوابات إسكندرية.

وطبعاً كان المناخ العام وقتها يوحي بحجم المصيبة اللي هتواجهنا.. الساعة اتناشر الضهر.. شهر أغسطس.. درجة الحرارة أقل من درجة انفجار أبابا بتلات درجات.. مشي كثير.. عرق.. فرهطة.. أبابا بيدور على أماما عشان يطلقها.. إنما أماما ناصحة ومستخبة تماماً وسط الحشود.. فهو مش لاقى غيرنا أنا وإخواتي يصب غضبه عليهم.. هتسألني طب انتو مالكم.. أقولك إنها رغبة القدر.

- هو نسه كثير على باب الملاهي يا حيوان؟!

- أبابا خلاص وصلنا.. شايف النقطة اللي هناك دي؟

- لا.. فين دي؟

- اللي أنا مش شايفها دي.. هناك أهى.

- إنت هتهزر يا حيوان؟! فين باقولك؟؟!

- هما دقيقتين مشي بس أبابا خلاص.

- دقيقتين بس؟ أكيد؟

- آه دقيقتين والله.. وعليهم ساعة إلا ربع جري بس ونوصل.

طبعاً الأرض كانت نضيفة وما لقاش أي طوب أو دبش يحدفني بيه.. وأنا استخيت وسط الأعداد الغفيرة من البشر اللي داخلين معانا الملاهي.

بعد معاناة.. وزحمة.. وتسألني إيه أكثر حاجة في التاريخ بتضايق

أبأبا أقولك الزحمة .. إنما كان ساكت لأن ده اقتراحه .. وهو مصمم يركب المرجيحة اللي بتلف زي اللي كانت في المولد رغم إني أنا وإخواتي حلفناله عشرتلاف مصحف إنها مش عندهم .. إلا إنه صمم وأصر يروح وأكدلنا إنه هيلاقها هناك بس إحنا اللي حيوانات كالعادة.

بعد معاناة دخلنا الحمد لله .. وبدأت علامات الانبهار على وش أبأبا .. ودي كانت من المرآت القليلة اللي أشوفه بيضحك ضحكة طفولية أدهشتني .. وسرحت وأنا باتابع ضحكته في كل وسائل التعذيب اللي جربها فينا واللي بتتنافى تمامًا مع البراءة اللي بتعلو قسماات وجهه السعيد في اللحظة دي.

كان منبهر بالمساحات والارتفاعات والصريخ اللي خارج من الناس اللي راكبة الألعاب .. وكانت حالة من الانبهار الفائق .. لحد ما وقف قصاد لعبة كان عليها حجم صريخ مش طبيعي .. كان اسمها على حسب ذاكرتي المشوهة «توب سبين» .  
نيلة منيلة بستين نيلة كده .. ومسمينها لعبة!

قال إيه الناس كلها بتقعد على كراسي جنب بعض .. وتفضل اللعبة تجيب جزمهم فوق وقفاهم تحت وهاتك يا صريخ لما لوزك بتقع من اللعبة وبتنزل تلمها لما تخلص اللفة بعد كده.

ما كانتش المشكلة أبدًا في وقوف أبأبا قصاد اللعبة وانبهاره بيها المبالغ فيه .. المشكلة إنه شبط بقى:

- إحنا لازم نركب البتاعة دي يا شريف.

- لا أبأبا اتفضل إنت .. أنا صعب .. كاتبين ممنوع للحوامل أهو!



- بس يا حيوان.. هنركب كلنا!

- طب ممكن بلاش أماما عشان نلاقي حد ياخذ العزا؟!!

- بس بلاش سخافة بقى.. قول لإخواتك يبطلوا أكل ويجهزوا.

- لا مش مهم.. سواء بطلوا أو ما بطلوش هما كده كده هييجيبوا

اللي في بطنهم زي الكابتن اللي راكب ومدلدل فوق ده..

شايفه أبابا؟

- آه آه شايفه.. الله!

- الله؟؟؟!!

طبعا أنا ربطت الإعجاب ده بالجزء السادي المحب للتعذيب

داخل تجويف وتلافيف مخ أبابا ربنا يرحمه ساعتها.

وفعلا أول ما الدور ده خلص.. وكان بيعدله بتاع عشر دقائق

تقريباً.. نطينا كلنا سبقنا أبابا عشان نلحق مكان في واجهة اللعبة..

أول صف.. يقولك دايمًا اللي بيبقى قدام جنب السواق أول واحد

بيتوفى ساعة الحادثة.. وإحنا مش عاوزين نتعذب كثير.

طبعا أبابا كان داخل ورانا على طول.. ولأن فيه شباب كثير جدًا

جدًا جدًا في الملاهي.. نطوا كلهم بسرعة بسرعة بسرعة.. وأخدوا كل

الأماكن.. زي ما بيحصل دايمًا لينا كلنا في المواقف اللي زي دي..

وأبابا ما لقاش مكان يقعد.

وبناءً عليه.. قرر أبابا ينتظر للدور الجاي.. وسابنا إحنا نجرب

اللعبة الجميلة السكر العسل دي.. لأول مرّة في حياتنا.

وللأسف الشديد أبابا وقتها كان صاحب أول واقعة رشوة عامل

ملاهي في تاريخ المدينة.. عشرين جنيه أيام ما كان الجنيه بيحسب











## الاعتراف العشرون مواسير ومواكيس

ببقى عليهم حاجات تشل ساعات.  
مين دول؟ الأمهات طبعًا.

خلينا نبقى متفقين إن معظم الطلبات اللي الأمهات بتطلبها مننا  
بتنقسم إلى جزئين: جزء بيتم بالحب والحنان والجنة تحت أقدام  
الأمهات.. وجزء تاني - وهو الأكبر - بيتم عن طريق التهديد.. هتعمل  
ولّا أقول لأبوك؟ هتعمل ولّا مفيش نزول؟ هتعمل ولّا مفيش أكل؟  
النتيجة في الآخر إن الحاجة بتتعمل الحمد لله.  
وده كان موضوع حلقتنا الليلة.

أماما مصممة إني ألمّع المكتبة.. وأنا مصمم إن ده مش دوري  
في البيت.. وإني لسه ملمعها من أربع سنين.. وأعتقد كده كفاية عليا  
لأنني ممكن أحس وأختفي من حياتكم خالص.  
أماما ابتدت توضحلي قيمة مساعدة الأم.. وقيمة دعوة الأم..  
وقيمة رضا الأم...







كده يا أجيب القماشة.. يا أجيب القماشة.. مفيش حل ثاني.. الحلول  
المطروحة بعد كده أن أبابا هيلمع بيا شخصياً بلاط البيت.  
طبعاً جريت على إخواني.. وقتلهم على المصيبة.. وابتدينا نفكر  
إزاي هنحل المسألة اللي ملهاش أي لازمة دي.  
نزلنا الجراج معاينة لمسرح الأحداث حيث سيلقى البطل مصرعه  
في نهاية الفيلم أكيد.

وابتدينا نشوف إزاي ممكن نطلع على المواسير لحد الدور الثاني  
عشان نجيب الهباة.. قصدي القماشة.

طبعاً جدير بالذكر إن أماما ما كلفتش خاطرها حتى تبص علينا  
من شبك المطبخ.. على أساس لو واحد مات مثلاً ما تبقاش متابعة  
لحظات وفاته.. يجيلها الخبر بالتلفون أسهل.

إخواني شبكولي إيديهم.. إني أعرف أطلع على الماسورة.. أبداً.

- شبكوا إيديكم كويس مش عارف أطلع!

- شبكنا أهو.. نعمل إيه ثاني؟؟!!

- ما اعرفش.. ارفعوني كده ولأ اعملوا حاجة!

- يا شريف إنت اللي لازم تطلع على الماسورة.

- ما أنا مش عارف أتتيل.. باتزحلق ورفيعة!

- هي شفاطة؟؟!!

- اخرسوا بس.. وارفعوا!

ساعة من المحاولات الفاشلة اللي معظمها انتهت إني  
وقعت على نافوخ كل واحد منهم مرّة لحد ما دماغهم ورمت من  
الخبط وكانوا قرروا خلاص يسيبوني ويمشوا.. لكنني هددتهم

إن اللي هيمشي هتفضل روحي الشريرة تطارده طول عمره بعد  
ما أبابا يطلعها في إيده.

وهنا كانت الفكرة الجديدة:

- بص.. إحنا نجيب الحبل الطويل بتاعنا.. وحد يطلع فوق السطوح..  
ونزله.. ونربطك ونشدك.. وإنت تمسك في الماسورة وتطلع.  
- فكرة هاييلة.

وفعلًا.. بدأنا التنفيذ.. حبل عظيم موجود عندنا متشال من جيراننا  
عشان إحنا في الخامس آخر دور.. وأحيانًا السباكين بيحتاجوه عشان  
تسليك المواسير.

وإخواتي الاتنين طلعا وحدفوا الحبل.. وأنا زي أي متسلق جبال  
محترف.. ربطت الحبل حوالين وسطي.. وشاورتلهم بإشارة.. هوبا  
فوق.. وعلى نداء:

- هيلا هيلا.....

وهما فوق يسحبوا ويقولوا:

- في القننا.....

- هيلا هيلا.....

- في القننا.....

- هيلا هيلا.....

- في القننا... تعبنا مش قادرين!

- اسحبوا باقول.. هيلا هيلا.....

- مش قادرين خلاص.. إحنا هنسيب!

- يا ختنا..... اي.. تسيبوا إيه أنا عدت الدور الأول











## الاعتراف الواحد والعشرون قسطرة الحاج زكي

«زيارة المريض واجب يا حيوان».  
أبأبا كان مصنع حِكَم ماشي على الأرض.. ودي الطريقة اللي  
كان بيعلمنا بيها الأصول والعادات والتقاليد.  
الحاج زكي راجل غلبان كان شغال عامل بوفيه مع أبأبا في الشغل..  
والدنيا عملت معاه عمايلها وتعب.. واضطر يعمل عملية قسطرة في  
مستشفى.. وطبعًا طبعًا طبعًا.. كان لازم أبأبا يزوره وإحنا معاه.  
هتسأل نفسك ثلاث كلاب بلدي يروحوا يزوروا واحد شغال مع  
أبوهم في الشغل بأمانة إيه؟ هاقولك هكذا كنا نحيا في هذه العائلة  
التي قرر الرب معاقبة الكوكب بها.  
- يا شرييييييييف.  
- خيرًا كثيرًا أبأبا.. أوامر؟  
- اجهز إنت وإخواتك عشان هنروح نزور الحاج زكي.  
- زكي جمعة؟

- زكي جمعة مين؟!  
- مش إنت بتهزر أبابا؟ وإحنا هتهزر وكده؟  
- إنت بتقول إيه يا حيوان؟!  
- أبابا ما إحنا ما نعرفش حد اسمه الحاج زكي من يوم ما اتولدنا!!  
- ده زميلي في الشغل.. وأنا مدير الإدارة.. ولازم أروح أزوره.  
- طب ما تفضل حضرتك وخذ معاك بورتوقان!  
- اخرس يا حيوان.. الراجل وحيد ملوش عيال.. ولازم نروح  
نزوره.. اجهز إنت وإخواتك.  
- لا ده إحنا ناخذ جواقة كمان بقى!  
- بتقول إيه يا حيوان?!  
- أمرك مطاع يا والد الأنطاع.  
لبسنا واتزوقنا وحطينا «ريحة».. وبوز كل واحد فينا ممكن يشنكل  
بقرة من كتر ما إحنا مش طايقين نفسنا.. آدي يوم جمعة انضرب في  
مقتل عشان هنروح نزور واحد ما نعرفوش.. ولسه هنتعرف عليه  
في المستشفى.  
الجمعة.. الثامنة صباحًا.. بلبس أفراح.. ما تعرفش إحنا راجعين  
ولأ رايحين لسه.. ملمومين في الشارع.. ركبنا العربية.. انطلقنا..  
وصلنا المستشفى تمانية ونص.. طبعًا.. ما هي حتى الكلاب بتبقى  
نايمة في الوقت ده.  
دخلنا على الريسبشن.. سألنا على الحاج زكي.. طلع لسه عايش..  
عرفنا رقم «العنبر» وطلعنا.  
الحاج زكي كان راجل عجوز.. وحواليه بقى في الزيارة موظفين



أصدقاء أبابا معاه في الشغل .. واللي جايب بورتوقان .. واللي جايب  
جوافة .. واللي جايب عنب .. واللي جايب موز .. وتحس إن الحاج  
زكي قاعد في طبق فاكهة كبير مش نايم على سرير.

وطبعًا الكل استقبل أبابا مدير الإدارة استقبال عالمي .. حتى الحاج  
زكي كان عاوز يقوم يسلم عليه .. إنما طبعًا العمود الحديد اللي جنبه  
اللي متعلق فيه كيس للمحليل وكيس للقسطرة اللي خرطومها نازل  
من تحت البطانية ومحدث عارف رايح فين حالت دون استكمال  
قدرته على إنه يقوم.

وطبعًا أبابا لحقه وخلاه يرتاح .. وسلم عليه .. ودعاه بالشفاء ..  
وقعد جنبه وإحنا الناس قامت وقاللنا اقعدوا .. إنما أبابا قالهم لا والله  
ما يحصل أبدًا.

تحس إنه كان عاوز يقولهم دول كلاب بلدي عادي ممكن نربطهم  
في أي سرير لحد ما نخلص وبعدين نبقي نشوف هنعمل فيهم إيه.  
نهايته ...

فضلنا واقفين بقى نسمع في حكايات الموظفين مع بعضهم ..  
وأبابا مسترسل في الكلام .. والكل بيسمعه .. حسيتهم إخواني والله  
من شدة إنصاتهم لأبابا.

لحد ما الحاج زكي .. بص يمين .. وبص شمال .. وكأنه بيدور  
على حاجة .. وطبعًا أبابا لماح .. وصاحب واجب:

- خير يا حاج زكي؟ عاوز حاجة؟

- تعيش يا بيه .. أنا بس بادور على الممرض.

- ليه؟ في حاجة تعبالك؟!







- حاضر.. حاضر يا حاج زكي.  
وطبعًا أنا وإخواتي شيلنا العمود هيلًا بيلًا.. والحاج زكي توجه  
إلى دورة الميه.. ودخل.. وطبعًا طبعًا.. العمود بره.. وده معناه  
إنه مش هيعرف يقفل الباب.  
- خش يا ابني!  
- اتلم بقي يا حاج زكي!  
- يا ابني دخل العمود!!  
- عمود في عينك قليل الحيا بقي!!  
- يا ابني دخل العمود واخرج إنت بره!!  
طبعًا شيلت أم الزفت العمود دخلته جوه دورة الميه.. بس كانت  
أضيق من إن العمود يخش ويقف مع وجود الحاج زكي.. فالحاج  
زكي اتوتر بقي.. وبقي مش عارف يعمل إيه.. وشكله محصور من  
ساعة ما خرج من الجوازات من ساعة.  
- باقولك إيه يا حاج زكي.. ادخل وأنا هامسك العمود جنب الباب  
بالظبط من بره وهاقفل الباب نص قفلة.  
- طيب يا ابني ربنا يكرمك.  
- ويسهلك يا حاج زكي.. خلص اللي جابونا بدل ما أرمي نفسي  
في البلاعة وأنتحر!  
وفعلًا.. أخويا مسك العمود.. أنا رديت الباب.. والحاج زكي  
بقي ابتدى يقضي حاجته جوه على مهله.. فين وفين بعد عشر دقائق  
الحاج زكي نطق:  
- يا ابني.



- لا.. ما إنت لو قلتلي يا ماما خلصت تعالي شطفيني هاخش  
أخنقك بالقسطرة!!

- لا يا ابني أنا قصدي أقولك افتح الباب خلاص.

فتحنا الباب.. كان الحاج زكي خلص ومبسوط.. وبدأنا رحلة  
العودة للعنبر تاني وسط صرخات الحاج زكي المتقطعة كل خطوة  
وإحنا مش فاهمين ده صوته الطبيعي ولأ إيه الحكاية.. كان ناقصلنا  
مترين ونصرخ زيه.

وصلنا العنبر بقى بعد ساعة ونص بالظبط.. اللي هو كان ممكن  
نروح بيتنا ونرجع ست مرات بالعربية.. والموظفين نفسهم اللي  
قاعدين مع أبابا شَبَّهوا علينا على أساس إنهم نسيوا شكلنا أصلاً.  
كلهم ساعدوا الحاج زكي بقى يطلع السرير تاني.. ويرجعوا  
العمود تاني مكانه.. والحاج زكي اتغطى وبقى زي الفل.. وأبابا  
بصلنا بصة فخر وكبرياء وكلها سعادة بنجاحه في تربية النوع النادر  
ده من الأنعام.

وبعدين الحاج زكي وهو لسه هيتدي يكلم أبابا.. لقيناه بيقوله:  
- يوووووه!!

- مالك يا حاج زكي؟ خير؟ تعبان؟ فيه حاجة؟

- لا يا أستاذ عبد العزيز.. بس... بس...

- خير يا حاج زكي؟

- أصلي نسيت أتوضى.. والجمعة قربت تأذن.. ومش هاقدر  
أروح لوحدي!

- إيه الكلام ده يا حاج؟! وتروح لوحدك ليه؟!



## الاعتراف الثاني والعشرون شيكو السوبر مان

مفيش حد في الدنيا دي كلها مهما حاول ينكر الموضوع ده ممكن  
يضحك عليك ويفهمك إنه ما جاتش في دماغه للحظات.. أو لأيام..  
أو كمان لحد النهارده.. فكرة وحلم إنه يبقى بطل خارق.  
اللي هيقول لا.. كداب يا جماعة.. الفرق بيني وبينكم إني باعترف  
بالمصيبة دي عادي.. إنتو بتتكسفوا مش أكثر.  
الأخ اللي بيقرأ كان نفسه يبقى سوبر مان.. والأخ الثاني كان  
بيحلم يبقى هر كليز.. الأخت اللي بتضحك حلمت تبقى سندريلا..  
والأخت الثانية اللي مستتية دورها كان نفسها تبقى سنو وايت.. كله  
حلم وكله اتمنى.  
أنا كمان.. في المرحلة دي من حياتي طبعًا كنت زي كل الناس..  
باحلم أكون سوبر أي حاجة.. سوبر مان.. سوبر ماريو.. كليوباترا  
سوبر.. سوبر ماركت حتى.. أي سوبر.. المهم أبقى بانقذ الناس.  
هتسأل تقولي يا ابني هتتقدهم من إيه؟ هاقولك والنبي ما أعرف..

بس أكيد أكيد.. في حد في لحظة ما في مكان ما في شارع ما في موقف ما.. هحتاجني أنقذه من مصيبة ما.. وده على أساس إنني أنا شخصياً ما باعملش مصايب وأبابا بيحبني وعارف أنا قد إيه نسمة طيارة في حياة أسرتنا السعيدة.. سعيدة مبارك..  
وبالفعل.. وعلى رأي المثل اللي دايمًا بيقول: «كل متوقع فهو آت».. آت نفسه جه الحمد لله.

كنت ماشي في يوم من ذات الأيام تحت البيت باتدلح في أي كلام في الأجازة زي عادتي.. وبعدين لقيت واحدة ست كبيرة قد أماما كده.. ماشية بصعوبة وشايلة أكياس خضار وراجعة من اتجاه السوق.. وطبعًا كان التصرف الطبيعي إنني أنقذ الست دي من الشيلة الثقيلة اللي شايلهاها:

- عنك يا طنط.

- إنت مين يا واد إنت؟ وعاوز إيه؟!

- أنا جاي أنقذ حضرتك!

- نعم؟؟!!

- قصدي جاي أساعد حضرتك.. هاشيل لحضرتك الأكياس.

- يا ابني إنت شكلك ابن ناس.. ومتربي.

- ميرسي ميرسي.. أبابا فعلاً مشربنا المر...

وفعلاً الست الحمد لله ناولتني الأكياس وأنا شلتها كلها.. والفتاء

جالني تاني بفضل الله.

كنت هاموت وأعرف إيه اللي في الأكياس ده.. مستحيل يكون

خضار.. ده أكيد دامبلز بتاعة حديد ولأ حاجة.

- حضرتك البيت لسه بعيد؟
- لا يا حبيبي.. خلاص هناك أهو.
- فين هناك ده؟ ما إحنا ماشيين في الشارع من ساعة؟!!
- أهو شايف العربية الصفرا اللي هناك دي؟
- اللي في آخر الشارع دي؟! آه بسيطة!
- أيوه يا حبيبي.. بعدها بقى هندخل يمين في شمال ونمشي  
لآخر الشارع.. وبعدين ندخل يمين في يمين.. وبعد شارعين  
تبقى عند البيت.
- لا هابقى عند ربنا.. أنا هاكون استشهدت خلاص!
- إنت شكلك ابن ناس يا حبيبي.. ومتربي.
- ميرسي يا طنط.. إن شالله ميرسي.
- وطبعًا مشيت ورا طنط وأنا شايل أثقال توازي مجموع رفعات  
النظر والرفع بتاعة بطل أوزباكستان في دورة سول ستة وثمانين..  
يمين في شمال في يمين في مشال في حططان في شمال في يمين  
بعظيم ما أنا متحرك خطوة تانية كنا وصلنا.
- تسلم إيدك يا حبيبي.. مش عاوزة أتعبك أكثر من كده.
- لا حضرتك مش هينفع.. خلاص دي النهاية بتاعة التعب بالنسبة  
لي.. صعب تتعيني أكثر!
- خلاص يا حبيبي.. أنا هاخذ الأكياس أطلع بيهم الكام دور  
دول ربنا يخليك.
- كام دور؟ لا.. بصي حضرتك.. أنا هاطلعهم.
- إنت شكلك ابن ناس يا ابني.. ومتربي.





- إيه يا طنط؟ عاوزاني أنصف الخضار ولا إيه؟!  
- لا يا حبيبي.. لازم أعملك لمون في الحر ده.  
- لا يا طنط ميرسي.. أنا لازم أروّح.. قصدي هاحاول أروّح.. ده  
أنا هاقد أسأل على بيتنا ساعتين أساسًا.  
- والله ما يحصل.. دول دقيقتين.. وبعدين إنت شكلك ابن ناس  
ومت...  
- متنيل بنيلة.. صح يا طنط.. اللمون بسرعة بعد إذن حضرتك..  
خليني أرجع أرتاح الراحة الأبدية على سريري!  
ودخلت طنط تعمل اللمون وأنا قاعد على كرسي جنب الباب  
حاسس إنني جزامة بالظبط.  
وأثناء طنط ما كانت بتعمل اللمون جوه وصوت الخلاط يطرب  
الأذان.. خرج من الأوضة ولدين لطاف.. واحد بتاع سبع سنين  
والثاني أربع سنين تقريبًا.. وقعدوا يبصولي.. يا قلبي عليهم.. سكر.  
وخرجت طنط من المطبخ شايلة صينية وعليها كوباية لمون فيها  
تلج.. شربت اللمون.. وطنط واقفة مع الولدين.. لحد ما خلصت  
اللمون اللي عينهم كانت فيه تقريبًا.  
- بالهنا والشفأ يا حبيبي.  
- ميرسي يا طنط.. أستأذن أنا بقى.. الواجب يناديني.  
- ممكن يا حبيبي أطلب منك طلب؟  
- اتفضلي يا طنط اطلبي أي حاجة ما عدا إنني أشيل إبرة من مكانها  
في حالتي دي!  
- إنت يا حبيبي شكلك ابن ناس.. ومترب...









طبعاً الجيران في ثواني كانوا قصاد الشقة ماسكين فيا وماسكين  
في طنط بنت الطنط اللي عمالة تصوت.. والناس فكراني حرامي  
حلل ألمونيا تقريباً.. واللي ماسكني من كمر البنطلون واللي ماسكني  
من قفايا.. وحلم سوبر مان اتحول بقدرة قادر إلى حلم إني أحتفظ  
بشبكة قفايا عذراء من غير ما حد يجيب فيها جون.

طنط لحد ما بطلت صوت والستات فهمت منها الحكاية.. كان  
رجالة العمارة شبه اتفقوا معايا على الاعتراف على كل أفراد عصابة  
تجارة الأعصاب والأعضاء مقابل إنهم يسلموا جثتي لأبأبا ست  
حتت بس.

- اعترف.. وديت الأولاد فين؟

- يا أونكل والمصحف كنا بنلعب استغماية وتلاقيهم تحت!

- الإنكار مش هيفيدك!

- يعني لو قتلتك كنا بنلعب مسأكة حضرتك هترتاح؟؟!!

- إنت باين عليك حويط!

- يا أونكل زمان العيال لسه مستخبية تحت أرجوك!

- إنت ساكن فين؟؟

- يا أونكل أنا ساكن في ميدان الاتحاد!

- رقم تلفون بيتكم كام؟؟

- اتفضل أهو.. أنا مش باضحك عليكم يا أونكل!

- مممم.. الولد شكله ما بيكدبش.

طبعاً العقلاء منهم أخذوني على جنب.. وقالولي:

- شوف يا ابني...



- أيوه يا فندم.. أنا عبد العزيز أسعد والده.. خير؟؟  
طبعا الناس حكّت لأبأبا.. وطنظ بقت تلطم وتصوت وهي بتعدد  
على شادي وفادي.. وأبأبا اتعاطف معاها لدرجة إنه تقريبا كان عاوز  
يضر بني بالجزمة في الشارع بس الناس كانت حاشاه عني.. ولقيته  
بيقول لطنظ:

- حضرتك إحنا مش هنمشي غير لما نلاقي الولاد.. إحنا مسؤولين  
عنهم.

طبعا طنظ ما بتردش.. بتلطم وبتصوت بس.. وأبأبا قرب مني  
وعينه بتطق شرار:

- احكي لي اللي حصل بالظبط يا حيوان!

- أبأبا كنا بنلعب استغماية...

- هما دول قدك يا بغل عشان تلعب معاهم استغماية؟!

- أبأبا طنظ هي اللي قالتلي العب معاهم!

- وإنت توافق ليه يا حيوان!!!!!!ان؟؟!!

- يا خت!!!!!!!!!!!!اي مش وقته.. مش وقته أبوس شبشبك الجلد..

نشوف العيال فين الأول.. أنا هيغمى عليا من المخمضة

خلا!!!!!!!!اص!!

وإحنا واقفين ولسه أنا وأبأبا بتكلم.. لقيت المشهد اللي طول

عمري باتريق عليه في الأفلام العربي بيحصل بحذافيره...

عربية بوليس بوكس لطيفة.. جاية وداخله الشارع وهي ضاربة

السرينة.

إنها النهاية.. مرحبًا بحقبة الأحداث.. أبأبا هيتبرا مني.. وهيطلق

أماما.. وإخواتي هيسر حوا في الشوارع.. وبعدين يتمسكوا.. ويجولي الأحداث.. ونعمل عصابة سوا.. ونسيطر على الأحداث ونبدأ تكوين آل كابوني فرع مصر.. لازم الواحد يعمل حساب المستقبل بسرعة.. بلا سوبر مان بلا زرنوخ بلاعات.

وصلت عربية البوليس.. ونزل منها الظابط والأمين.. وبعدين كأن القدر قد أراد أن ينقذني لأعمال الخير اللي كنت باعملها مع طنط وعيالها إلهي يسهلوا جميعاً.

لقينا شادي وفادي نازلين من العربية.. وبيجروا على طنط اللي ما ضيعتش وقت.. حضنتهم وأغمى عليها على طول في الأرض وسط ستات العمارة.

الظابط فهمنا إنهم لقوا العيال تايهين في طُرة بعد ما ركبوا ميكرو باص ونزلهم هناك.. ولما ابتدوا يعيطوا أهل الخير جابوهم على القسم.. العيال كانت حافظة رقم التلفون.. والقسم جاب عنوانهم من النمرة.. وجابهم على البيت.

الناس شكرت الظابط المحترم.. أبابا حاول يخليه ياخدني ويخلصه مني.. إنما الظابط قاله إنه مش ناقص عاهات.. أبابا أخذني ورجعنا البيت بعد ما طنط قالت لأبابا على كل اللي في نفسها.. وأبابا استحملها للآخر.

حاولت أستخبي منه في التسريحة.. بس أبابا لم يترك في نصي الفوقاني مكاناً إلا وزاره بكفه الرقيقة.

بقيت أنام بالليل وأحلم بسوبر مان طائر.. والناس بتنده عليه وتستغيث من تحت وتقوله:





# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه



## الاعتراف الثالث والعشرون عيد أم وعرض على النيابة

أماما الله يديها الصحة ما كانتش معودانا نجيبها هدية في عيد  
الأم.. ما كانتش مهتمة على غير العادة.  
كان كل همها إننا نقلل من حجم الكوارث الذي لا ينقطع عن  
البيت وبقى كده قدمناها أجمل وأروع هدية في الدنيا!!!.  
لكن إحنا لما ابتدينا نوعى ونقول أماما وأبأبا أنا وإخواتي ونشوف  
صحابنا في المدرسة بيتشاوروا عشان هدايا عيد الأم.. قررنا في سنة  
إننا لازم نعمل مبادرة وناخد أماما معانا ونشتريلها هدية بنفسنا.  
وأماما كانت هتبوس إيدينا نعتقها لوجه الله تعالى ونتركها في  
سلام وسكينة.. إنما سكينة نفسها وريا وعبد العال اللي هما إحنا  
كنا مصممين نكرم أماما في عيشتها.. هع هع هع.  
وكنا محوشين مبلغ محترم من كتر الغتاة اللي كنا بنغتها على  
أبأبا أنا وإخواتي فيدينا فلوس عشان نخرس.. ٣٠ جنيه مصري..  
من القديم ده اللي كان ماسك نفسه.

أماما طبعًا كانت فاهمة إننا هننزل نشتريلها بيهم مثلًا جلايية  
ولاً طرحة ولأ أي حاجة من اللي الناس بتشتريلها في الوقت بدل  
الضايغ زي عماد متعب كده.. الهدايا اللي على الحُرك ك دي.  
إنما هي اتفاجئت وإحنا داخلين بيها محل «ذهب».. ولقيتني  
باكلم الراجل بكل ألاطة عشان يورينا خاتم لطيف ظريف خفيف  
من اللي عنده.

أماما حاولت تفهمني إنها مش عاوزة ذهب.. إنما أنا وإخواتي  
راسنا وألف صرمة لنحبسها.. قصدي نجيلها هدية.  
الصايغ قعد معانا حوالي ساعة كان على وشك يقلب المحل  
فرن فينو من كتر التجارب والطلبات.. وفي الآخر ابتدى يحاول  
يطفشنا ويقول:

- ده غالي.. ده ثقيل.. ده غالي.. ده ثقيل.

فأنا طبعًا اتترفت عليه لأنني مش جاي أشحت.. وقلته:

- غالي إيه يعني؟! ده إحنا مش هيكفيننا واحد أصلًا.. دول  
صوغنين جدًا.

الصايغ رد وقال:

- الواحد من ده بـ ١٥٠ جنيه.

طبعًا أنا اصفرت زي الذهب بالظبط من هول الخضة.. وبعدين  
حاولت أتماسك قصاد أماما اللي نظراتها كلها شفقة على وضعي  
اللي بقى شبه وضع العرسة اللي حالقيلها زلبطة.

الكرامة بتاعتي اتبعزقت ولقيت الدم بيضرب في نافوخي.. وبدون  
وعي قلت للي ينشك في دهبه:

- بس؟؟ ده رخيص وتافه.. هناخده.. لفهولنا لو سمحت بس لفه  
عيد الأم اللي هتتجسس.

الراجل راح يلفه.. وأماما ابتدت تبص حوالها عشان تشوف فين  
أقرب منفذ لمخارج الهروب.. عشان لما البوليس يبجي تقول إننا  
خاطفينها وتجري.

حاولت أطمئنها أنا بقي.. قتلها:

- ما تقلقيش أماما.. إحنا معانا ٣٠ جنيه.. والباقي في البيت  
أماما.. محوشين.. ادفعي إنتي دلوقت ولما نروح هنديهو ملك  
على داير مليم.

طبعًا هي يا عين أمي قعدت تقنعني لا بلاش لا كتير زي كل  
الأهمهايات مع أولادهم.. وأنا وإخواتي.. أبدًا.. لا ممكن..  
مستحيل.

وفي النهاية رضخت أماما لضغوطاتنا واشترت الخاتم.. وخرجنا  
من محل الذهب نحتفل لحد البيت.

ولما وصلنا.. أماما ابتدت تسألنا عن باقي الفلوس.. مش  
عارف ليه ساعتها كل واحد فينا ابتدى يصاب بنوع معين من أنواع  
«الإنكاروفوبيا».. ومع الضغط وصلت لمرحلة «استعباطوفوبيا»..  
وصلت لمرحلة إن الواد الصغير ابتدى يبصلها باندهاش ويقولها:

- إنتي مين يا ست انتي؟! وعاوزة إيه؟!

ومع الحصار المستمر.. اضطريت أعترفلها إننا معناش فلوس  
تاني.. وكنا عاوزين فعلاً نجيبها حاجة تليق بيها وحاجة تحسنا  
إننا جبنالها حاجة حلوة.





## الاعتراف الرابع والعشرون فاتن السباك

بكل تأكيد لازم الواحد مننا يكون مر بأكثر من تجربة عاطفية في حياته.. ولأني كنت نجم الشارع كله بصفتي الأقرب شبهًا للسحالي السنغالي النادرة ودي حاجة ما بتتكررش كثير في الدنيا.. كنت طبعًا مثار ضحك وابتسامات وضحكات من كل البنات اللي عندنا في الشارع.

بيني وبينكم أنا كنت فاكرها جاذبية أرضية بقى وبتاع.. بس الحقيقة التي لا تقبل الجدل أو النقاش بعد مرور السنين دي كلها إن ما كانتش أكثر من جاذبية الصواب لتحت الدراعات.. زغزغة تعمل ضحك بس. كل ده اتغير مع اللحظة الأهم في حياتي العاطفية وأنا في تانية إعدادي.. يااه.

مش هاقدر أبدًا أنسى اللحظة اللي أبابا نده فيها كالعادة:

- يا شريiiiiiiiiiiiiيف.

- أفنظم أبابا.

- الحنفية بتنقط ومحتاجين قلب جديد.  
- هتاخذوا قلبي خلاص؟ هو أنا مش نافع للدرجة دي؟!  
- انزل يا حيوان روح للسباك هاتلنا قلب جديد للحنفية!  
- آاه.. شوف وأنا اللي افكرت... طب عاوزه قلب حب ولا قلب  
داب ولا طالش؟  
- بتقول إيه يا حيوان؟!  
- لا أبابا باقول حالاً.  
طبعاً أخذت فلوس ونزلت رحى للسباك اللي فاتح في شارع  
الترعة عندنا في المعادي.. ودخلت المحل.. وأول ما خطيت برجلي  
جوه المحل.. كانت في انتظاري...  
فاتن.  
مين فاتن؟؟ دي حضراتكم بنت السباك صاحب المحل.  
واقفة بتبيع بنفسها وهي في كامل رونقها وزينتها.  
اللي كل ما بافتكرها دلوقت بادور على سكينه أضرب نفسي بيها..  
بس بتبقى مراتي بتقطع بيها السلطة..  
كانت فاتن مثال حي للعمى الحيشي اللي بيعجي للمراهقين اللي  
في سني.  
قشفت واقف على الأرض.. ومفيش اهتمام بشعرها ولا بلبسها..  
وصوتها وطريقة كلامها كانت تنافس رياض القصبجي الله يرحمه.  
إنما هنقول إيه؟؟ القلب وما يريد بقى.  
مصمم أسجن أبابا أنا.. أو أجلظه.  
حصل انجذاب أحادي الطرف من ناحيتي.. تجاه فاتن.. لأن

فاتن كانت تقريباً حولة ما بتشوفش حاجة.. أو مش مهتمة بالسحالي السنغالي.. مش عارف بالظبط المشكلة كانت فين.  
إنما اللي فاكره إنني خرجت من محل السباك وأنا شايل في أيدي قلبيين: قلب الحنفية.. وقلبي اللي بيدق.  
وكان لازم أحكي لحد من صحابي على مشاعري اللي بقت شبه بامبرز العيال اللي واكله ملوخية.. مظروطة الدنيا.  
وطبعاً كان صديقي وقتها ياسر.. اللي كان أساساً عاطفي زيادة عن اللزوم.

- وبعدين يا شريف؟

- وبعدين إيه؟؟ بس خلاص أنا حكيتلك!!

- لا قصدي وبعدين هتعمل إيه؟

- لا ولا حاجة.. هاكل علبة زبادي وأنام.

- إزاي بقي؟؟ إنت لازم تعترف لها بمشاعرك!

- مشاعر إيه يا ياسر دي ممكن تمسح بيها مناخيرها!

- لا لا.. إنت لسه مش عارف قوة الحب.

- أنا اللي عارفه قوة الضرب بتاعة أبابا.. اخرس خارس!

- لا لا لا مش ممكن.. أنا لازم أخليك تعترف لها.

طبعاً قعدنا ساعة يقنعني وأنا كنت على جثتي أعمل اللي بيقول عليه ده.. ورد إيه اللي هاروح لها بيه؟! أدخل على أونكل السباك شايل ورد؟! وبعدين شريط كاسيت إيه اللي هاسجله وأحذفه جوه المحل وأجري؟! مش يمكن يبجي في عين أبوها يصفئها والمحل يتقفل وفاتن تشحت.. وأبابا يتسجن زي ما بتخطط؟!!







طبعًا.. بلا وعي.. بنفس الشبشب.. جري على الميدان.. وقرار  
هام.. أول ما ألقى الأتوبيس هيتحرك.. أحذف نفسي تحت العجل..  
ملهاش حل.

وستر ربنا إني لقيته واقف والسواق لسه هيطلع الأتوبيس.. جريت  
عليه:

- والنبي يا عم...

- عاوز إيه يا ابني؟

- ممكن تغير الأتوبيس ده وتاخذ واحد تاني؟

- أتوبيس إيه اللي أغيره يا ابني؟! سيينا نشوف شغلنا!

- أصل مكتوب على جنبه كلام يخصني!

- بس يا حبيبي بلاش لعب عيال!

- أبوس رجل الكمسري استنى دقيقتين اتنين بس!

طبعًا الراجل لقاني منهار وهابتدي أعيط.. وافق على الدقيقتين

اللي استغليتهم في إني جبت فوطة زفرة من السواقين ودعكت بيها

الكلام اللي على جنب الأتوبيس وخصوصًا الاسم الثلاثي اللي

شكله مش هيلحق يطلعله بطاقة باين.

واتحرك الأتوبيس بسلامة الله متجهًا إلى ضواحي القاهرة من غير ما

يشيل معاه عار العائلة اللي كان هيلف البلد كلها.. ورجعت أنا ورجلي

مش شايلاني على البيت.. بس كان لازم أعدي على ياسر الأول..

هي غلطتي من الأول إني ما زقتهوش من البلكونة وخلصت..

إنما ملحوقة.. مسافة السكة:

- ياسر.. اتشاهد على روحك!







## الاعتراف الخامس والعشرون كوسبو..بوتر

جيلنا عارف كويس قوي يعني إيه كمبيوتر.  
خصوصًا إن الاختراع ده ظهر وإحنا واعييين في منتصف  
التسعينيات كده.. وبدأت أخباره تنتشر بين الشباب الحلو اللي زي  
حالاتي.. وبدأت الفكرة تتمكن مني ومن إخواني.. لحد ما قررنا  
القرار الأهم:

- جود مورنينج أبابا.
- صباح النور.. خير؟
- إحنا عاوزين نلحق العصر.
- عصر إيه اللي تلحقه؟! ده الضهر لسه مأذن يا حيوان!!
- أبابا إحنا عاوزين نلحق العصر الحديث.. مش العصر في  
الجامع!
- يعني إيه يا شريف؟ مش فاهم حاجة!
- عاوزين نجيب كمبيوتر أبابا.



- بكام البتاع ده؟

- يعني بحوالي ثلاثلاف جنيه أبابا.

- طالق.

طبعًا طالق دي كان بيقلهالي وهو بيشاور على المطبخ اللي هو روح قولها لأماما لو فتحت سيرة الموضوع ده ثاني أو ذكرت الرقم ده قصاده ثاني.

اللي زي أبابا أساسًا كان بيتعامل مع الريموت إنه بيطلع أشعة تجيب المرض الوحش.. كمبيوتر إيه وبلا أزرق إيه؟؟ إنت عاوز تفجرلنا البيت!؟

ولأننا طبعًا عارفين إن أبابا ما يقدرش يستغنى عن أماما.. وإنه ممكن يبقى سبب اختناق المجرة كلها لو هي أبدت اعتراض أو امتعاض مننا.

قررنا بلا وعي إننا نستخدم أماما كنوع من أنواع الساتر البشري.. لو ضرب أي رصاص هيجي فيها الأول.

وأقنعنا أماما إن الكمبيوتر ده مستقبلنا.. وإننا هنتشرد في الشوارع لو الكمبيوتر ما جاش.. وهي رحبت بفكرة إننا نتشرد في الشوارع دي جدًّا.. بس بعد كده خافت لنجيلها مصيبة ونيجي على البيت.. فقررت تحاول تقنع أبابا.

وطبعًا بعد ما أبابا حلف بكل الرسل والأنبياء والأديان والنعم إنه مش هيجيب البتاع ده.. لم تنقض الليلة إلا وأماما مقنعه إن البتاع ده عند كل صحابنا وبيتعلموا عليه وضروري للشغل والمستقبل العملي وكل الهجص ده.















إنما هو كان متأكد إن نجاحه في الماضي السحيق في إعادة تصليح سخان دماسة الفول المدمس مرّة قبل كده ما جاش من الفراغ.. وده إداله ثقة عظيمة في قدرته على تصليح الجهاز.

- أبابا الرامات ما بتتمسحش بالكولونيا!

- اخرس يا حيوان!

- أبابا الرامات مش زي حجارة الريموت.. ما ينفعش نعضها!!

- بس بلاش تفاهة!

- أبابا الرامات دي ما بتتنفحش.. دي مش غيارات!!!

- قلت اخرس يا حيوان!

- أبابا فيه ريحة شياط بنت حرام!!!

- دي أكيد جاية من المطبخ.

- لا ورحمة نظري دي طالعة من الجهاز!

- غريبة.. مع إنني لسه منضفه زي ما شفت!!

- لا.. اللي أنا شفته ده ما كانش تنضيف.. ده كان إزهاق روح

الكمبيوتر!

وهوب.. بووووووووووم.. صوت فرقة لطيف.. ودخان على

شكل دخان السجاير الخفيف كده طالع من طرف الجهاز.. وسط

متابعة أبابا ولطمي.

وبالكشف على الجثة.. وعمل التشريح اللازم بواسطة فريق الطب

الشرعي.. تم التحقق من احتراق منظم الكهرباء الخاص بالجهاز

والمعروف سوقياً باسم «الباور سابلاي».. ولزوم تغييره.. مع ضرب

القديم في الخلاط ضرباً كثيراً مبرحاً حتى يستغيث.



## الاعتراف السادس والعشرون السُّلَّة رَابِت

في قرارة نفس كل واحد فينا حلم.. حلم حلمه زمان وعاش عليه  
واتربى عليه.. وأحيانًا حاول ينفذه.. وأكد في مننا اللي حقق حلمه..  
وطبعًا في مننا اللي حلمه دخل بيه في الحيطه.. لا قصدي حرفيًا دخل بيه  
في الحيطه مش تعبير مجازي يعني.. زي ما حصل معايا في حلمي كده.  
أنا وإخواتي كنا ما شاء الله تبارك الله علينا خيالنا واسع عالي  
وعالمي.. ويهرب منه كل أصحابنا وأقاربنا والناس اللي في الشارع..  
لأن خيالنا ولله الحمد كان خيال مرتبط دايماً بحادثة أو كارثة بيولوجية  
في آخر كل مرة.

كنا متميزين قوي اسم النبي حارسنا وصاينا.. وكان أكثر واحد  
عارف الكلام ده أبابا.. فكان بيحاول دايماً الله يرحمه يحافظ على  
علاقته بالجيران والناس الطيبة اللي ساكنة عندنا في الشارع والميدان  
عن طريق إنه يؤكد علينا إننا لما نلعب.. نمشي نغور في داهية نلعب  
بعيد عن البيت.



إحنا كنا الأول فاكرينه خايف على البيت لنفجر الأساسات  
ولّا حاجة وإحنا بنلعب زي ما إحنا متعودين نعمل في بيوت  
الناس.. بس مع الوقت عرفنا إنه مش حابب يخسر الجيران اللي  
قعد طول عمره مستور في وسطهم وله شنة ورنة وكلمة مسموعة..  
أبابا وكده بقى.

وعشان كده كنا دايماً لما نختار نعمل حاجة جديدة.. كنا فعلاً  
بناخد صحابنا ونروح نلعب بعيد.. في شوارع واسعة.. عند مجموعة  
عمارات عالية على الكورنيش اسمها أبراج عثمان.. كل أهل المعادي  
عارفينها.

وهناك.. نشأ الحلم.. أيوه.. الشوارع الواسعة والمنزل الجامد  
الطويل جداً جداً اللي كنا بننزله وإحنا رايعين هناك نخرب  
المكان.. خلانا نقعد في يوم من الأيام في أجازة نص السنة.. في  
عز الشتا.. وإحنا بنأسس لفكرة مجنونة أنا وإخواتي لما قتلهم:  
- عاوزين نظير.

- يعني نط من البلكونة؟! الجو ساقع والدنيا هوا.

- لا.. نظير من الأرض.. لفوق.

- بس يا شريف بلاش عبط! نظير إزاي؟!!

- هو إحنا محتاجين إيه؟ سرعة.. منصة قفز.. جناحات.

- أيوه بس إحنا عندنا شعر مش ريش!!

- وهي الطيارة عندها ريش يا أغيبيا؟!!

- طب اشرح لنا كده يا فالح.

- السرعة في العجلة بتاعتنا اللي تحت.. على منزل أبراج عثمان.

- وبعدين؟
- نحط خشبة كبيرة في الآخر مايلة لفوق أكنها مطلع...
- وبعدين؟
- نركب لوح أبلكاش كبير قوي للعجلة من الجنب زي الجناحين...
- وبعدين؟
- وبعدين رجال الطب الشرعي يستخرجوا الجثة من مكان الانفجار بقى!
- طبعا يمين شمال.. فوق تحت.. يهديك يرضيك.. حادي بادي كرنب زيادي.. قررنا ننفذ الفكرة بالاستعانة بمجموعة من أصدقائنا المقربين.
- آه طبعا ما هو لازم يكون في حد معانا عشان يبلغ الأسرة باسم المستشفى اللي هنتلم فيها كلنا أو على الأقل مكان استلام الجثث.. أيهما أقرب.
- وفتتنا على النجار جبنا منه لوح أبلكاش عظيم.. دفعنا فيه دم قلبنا.. وخليناه ينشره على شكل جناحين.. طول الجناح الواحد اثنين متر.
- وهوب شيلناه هيلا بيلا ومعانا حمادة المطافي وحماد الطرقة وحماد الصيدلية.. وأنور وأحمد وخالد وكيمو.. وطلعنا على أبراج عثمان.
- هنعمل إيه يا شريف؟
- بصوا.. شايفين آخر المنزل بعد تلتमित متر؟
- آه.. هناك كده.. عند البرميل.
- حطوا بقى الخشبة دي.. وحطوا تحتها البرميل اللي هناك ده.. عشان تترفع لفوق.. والعجلة تنط لمسافة عالية.

- فكرة هايلة.. وخصوصًا لو غلطت ودخلت في البرميل!  
حمادة أخذ الخشبة فعلاً وراح ضبط المنط.. أو منصة إطلاق  
العجلة الطائرة اللي هتبقى حديث العالم لسنوات عديدة لأنني أكيد  
هاحطم أرقام الأخوين رايت في الطيران بالعجلة الرالي.. واسم  
عباس بن فرناس هيتشال من كتب التاريخ ويتحط مكانه شريف  
النساس.. دي مسألة وقت مش أكثر.

طبعا حمادة ثبت البرميل كويس.. وثبت فوقه الخشبة كويس..  
وشاورلي من بعيد إن كله كويس.. مستخدمًا إشارات كونسطابلية  
مرور الطائرات اللي على حاملات الطائرات عثمان سبعتاشر المتجهة  
إلى نهايتها.

إحنا في آخر المطلع فوق بقى قاعدين نربط الأبلكاشة الأربعة متر  
في العجلة.. وأحبال غسيل ونلف.. ونربط.. ونشد.. عشان تمسك  
نفسها لحد ما بقت زي الحديد.

طبعا الناس اللي كانت معدية شافت المنظر.. في منهم اللي راح رمى  
نفسه في بلاعة من الضحك.. واللي ما انتحرش من الضحك بقى ماشي  
يخبط كف على كف ومفيش على لسانه غير لا حول ولا قوة إلا بالله..  
معلش.. كل العظماء حصل معاهم كده.. في البداية يسخرون  
منك.. ثم في النهاية أبابا يبجي ياخذك من القسم.

كل المخترعين اللي زبي سخروا منهم.. وقللوا من قيمتهم..  
لحد ما طلعا برميل المجد.. قصدي سلم المجد.

أنور قرب مني.. وحط إيده على كتفي في لحظة مؤثرة جدًا..  
وقرب وقال لي:

- إنت لازم تبقى عارف حاجة مهمة يا شريف...  
- عارف يا أنور.. عارف إن دي لحظة تاريخية.. واسمي هيكون  
علامة من علامات الطيران.. وتأكد إنني مش هاعرفكم ثاني أبدًا.  
- لا أنا مش عاوز أقولك كده.. أنا عاوز أنصحك.. أول ما العجلة  
تطلع على الخشبة لازم تعمل بيها حضان وتشد الجادون لفوق  
عشان تديها قوة دفع أكبر.  
- تصور فعلاً دي فكرة ممتازة.. أنا هاذكر اسمك في كل لقاءاتي  
مع المخلوقات الفضائية اللي هتسأل على الاختراع ده.. وبرضه  
مع صحفيين صفحة الحوادث كلهم.. اطمئن يا أنور.  
حمادة تحت بقى ابتدى يسقع من الهوا اللي كان شديد جدًّا في  
المكان ده بفعل الوسع الرهيب وقرب المكان ده من الكورنيش..  
وطبعًا لأننا في شهر يناير والهوا يجيب انفصال في الشبكية من  
شدته.. بقى يشاور بجنون بقى.. وإشارات كونسطبالات مرور  
حاملات الطائرات المتفق عليها اتحولت لإشارات خارجة عشان  
بقالنا ساعة بنظبط العجلة وهو واقف ساند البرميل عشان الهوا  
ما يوقعوش.  
لحد ما جت اللحظة الحاسمة.. وكل صحابنا ودعوني.. أقصد  
شجعوني.. وأنا ركزت نظري على الخشبة.. مطلع المجد.  
وهوب.. انطلقت العجلة على المنزل...  
المنزل اللي كانت زاوية ميله أكثر من خمسة وأربعين درجة.. وده  
خلا العجلة تنطلق من صفر إلى سرعة الصوت في عشر ثواني تقريبًا.  
في أول ثلاثة متر.. كنت بابدل.. قال إيه عشان أزود سرعة.









أنا حتى استخسرت أقول يا ختنا!!!!!!!!!!!!!!!!!!!!!!اي.  
دي لحظة الموت في صمت.. كفاية الدوشة اللي هتعملها العجلة  
لما تلمس الأرض.  
بدون تعليق بقى...  
باقي الأجازة.. قضيتها باكل الرز بشفاطة.  
اتفشفت يا ختنا!!اي!!

#عجلة\_الزمن  
#أربعون\_ألف\_فرسخ\_تحت\_أسفلت\_الشارع

## الاعتراف السابع والعشرون طابور فاتورة بوليو

«نام بدري عشان هنتزل الساعة ٧ الصبح نروح ندفع الفاتورة». .  
طبعا ده كان خبر من الأخبار اللي تجيب غممان نفس أسبوع..  
أمر من أبابا بالتجهيز لرحلة إلى السنترال عشان ندفع فاتورة التلفون  
عشان معادها ما يروحش علينا وينزلوا علينا غرامة ١٠ جنيه.. دي  
تبقى مصيبة عند أبابا.

مش عشان العشرة جنيه.. أبداً والله.. عشان ده معناه إننا مش  
ملتزمين ومهملين ومش عارفين ننظم وقتنا وندفع الفاتورة اللي  
إن شالله عنها ما اتنيلت اندفعت طالما هاصحى الساعة ٦ الصبح  
عشان أنزل ٧ في أجازة الصيف.

كل ده بقى حصل ليه حضرتك؟

عشان أبابا بقاله شهر بيقولنا روحوا ادفعوا الفاتورة وإحنا طبعا  
بنقوله حاضر.. بس ما بنروحش:  
- يا شريسييسيف.







وقفت فعلاً.. ساعة كاملة الطابور ييمشي بسرعة بريشة النملة..  
تقريباً اتحركت مسافة ٣ سنتي.

بعد نص ساعة كمان وأنا واقف في نفس المكان مش مصدق اللي  
بيحصلي.. لاحظت إن مفيش حد بيخرج من السترال.. والطابور  
ما بيتهبش يتحرك.

ولقيت أبابا جاي من بعيد وهو مش طايق نفسه وبيدور عليا غالباً  
عشان يخنقني بالفاتورة.. بس المشكلة إنني كنت لسه ما دفعتهاش  
فمش هيعرف يخنقني غير بالجزمة اللي في رجليه.  
أبابا قرب وهو متترفز:

- إيه يا حيوان ده كله؟! ساعة ونص؟!

- آه أبابا شفت.. عشان تعرف بس مقدار المعاناة.

- الجو ابتدى يحرر يا حيوان وأنا قاعد في العربية!

- وبالنسبة لعجل أبيض اللي إنت مخلفه وواقف في الشمس  
الساعة ونص دي كلها عادي؟!

- ما دفعتش ليه كل ده خلصني؟!

- إنت شايف إيه أبابا؟ واقف في الطابور عشان أسنده مثلاً؟!

- طب فاضل قصادك كام واحد؟

- يعني تقريباً ألف خمسمية سبعة وتسعين واحد كده.. اللي هو  
يا ندفع الغرامة يا هتدفع أدها عشر مرات علاج فسافيس لرجلي  
من الوقفة!

أبابا خلاص ما بقاش طايق مني كلمة.. وراح سائل الراجل اللي  
واقف قصادي عن سبب ثبات الطابور الخامس اللي إحنا واقفين فيه





ومش بس كده بقى .. لا .. الموظف لأنه موظف .. حب وجود بقى :  
- ما افتكرش السيستم هيرجع تاني النهارده .. اللي يحب يستنى  
يستنى .. واللي يحب يمشي وييجي بكرة عشان وقته يمشي .  
الناس بقى ما بقيتش عارفة تعمل إيه .. أبابا نفسه اتلخبط .. ما بقاش  
عارف ياخذ قرار .. وبصلي بعد كل ده .. وقالى :

- إنت عارف إنت حيوان قد إيه ؟!

- قد الطابور اللي كان واقف ده كله أبابا!

- لأ .

- طب قد الطابور اللي هيبقى واقف بكرة أبابا وأنا فيه وهادف  
الغرامة من مصروفي !  
- برضه لأ .

وأثناء ما كنت أنا وأبابا بنلعب عروستي أنا قد إيه حيوان .. فيه ناس  
ابتدت تتحرك وتمشي من الزهق بعد جملة الموظف اللي ما يوعى  
يخرج من السترال .. وفجأة :

- السيستم رجع تاني يا حضرات .. هنشغل .. كله في الطابور .  
طبعا إنتم فاكرين إن دي بقى لحظة سعيدة وبتاع .. وإن المفروض  
أكون مبسوط بقى إننا هندفع أخيرا وهاخلص من تريقة أبابا والكلام  
الفستكاوي ده .

أسف والله!

الناس اللي كانت مشيت من الطابور .. وخرجت بره .. سمعت  
الراجل وباقي الناس ندهت عليها ورجعوا كلهم .  
وطبعًا .. كل اللي رجع .. عاوز ياخذ مكانه اللي كان واقف فيه







#السيستم\_وقع\_على\_جدور\_رقبته  
#السيستم\_قام  
#شيلو\_الواد\_من\_الأرض  
#صعبان\_عليا\_الواد  
#بس\_مش\_صعبان\_على\_أبابا

## الاعتراف الثامن والعشرون وصفة الاقن السحرية

البلوغ.

آسف إنني هاتكلم في الموضوع ده.. بس أكيد يعني مش هاتكلم فيه من الزاوية اللي ما ينفعش نتكلم فيها.. أنا مضطر آسفاً إنني أكلمكم على الزاوية اللي محدش بيحب يتهيب يتكلم فيها...  
شكلنا وقت البلوغ.

مع الأسف الشديد.. وزى ما كلنا عارفين الفترة دي من حياتنا كنا كلنا بنبقى شبه بعض.. ولاد وبنات.. قطعة واحدة.  
الكل طالعله شنب.. الكل صوته شبه الضفدع اللي حد ساند على وركه.. الكل بالع تفاحة آدم وطالعة في رقبتة مخلياها شبه الوزه اللي بالعة مانجاية.

مناظر لا تسر عدو ولا حبيب بعيد عنكم.. وكان العقاب الأسوأ في الفترة دي هو التصوير.. يعني اللي أهله غضبانين عليه.. يعملوله عيد ميلاد يصوروه فيه.. والصور دي تتحط في

ألبوم ويفضلوا يساوموا فيك لحد ما ربنا يتوفاك.. أو البيت يتحرق  
بالألبوم اللي فيه.

إحنا بقى في شلتنا الصغيرة بتاعة الشارع كمجموعة من ذكور الأيائل  
الثلجية في موسم تغيير القرون.. كان عندنا مشاكل تانية في المرحلة دي.  
وزي أي مجموعة ولاد.. كان الكل بيتفاخر بقى إنه طلعه شوية  
وساخة زيادة تحت مناخيره وابتدى يحلقهم.. أو حد تاني في هباب  
طالعه في وشه ومحدده وعامل قال إيه عنده دقن.. وكانت بتتخلل  
المرحلة العصبية دي.. مرحلة التريقة على الشباب المتأخر في ظهور  
الريش على الوش.. قصدى شعر الدقن.

والكلام ده كان ظاهر قوي وواضح على صاحبنا عماد وهو واقف  
بيصرخ كل يوم وبيقولي:

- يا جماعة شوفولي حل.. أنا أعصابي انهارت!

- يعني إنت عاوز إيه مش فاهم؟

- أنا دقني مش عاوزة تطلع يا شريف!

- احلقها كل يوم وهي تنقل.

- باحلقها كل يوم ثلاث مرات بعد الأكل ومفيش فائدة!

- خلاص إن شالله ما طلعت.

- يا شريف ساعدني حرااااااام عليك.. إنت صاحبني!

طبعا أنا ما كنتش فاهم إيه المطلوب بصراحة.. يعني أنا دوري إيه

في القصة دي مش قادر أستوعب.. لو الحكاية إنني أحلقه بنفسني

وده هيجيب نتيجة مش هاتأخر.. بس الولد بيحلق لوحده.. فاللي

هو أعمل إيه يعني مش فاهم؟!



وكان طبعًا لازم أستعين بذوي الخبرة من أصدقائي اللي في سننا ومعانا في الشلة.. واللي دقنهم ابتدت تنبت زي الفول النابت كده.. شوية زفت وطالعلم على وشهم وفرحانين بيه.. لا عاوزين ينضفوه.. ولا منه له شكل.

ولأن عماد ابتدى يزن ويهددني إنه هيدبح نفسه بموس الحلاقة لو ما شفتلوش صرفة.. رحى لأحمد صاحبنا في الشلة.. اللي كان عنده ميزة بقى إنه عنده حوالي تسع شعرات زيادة عن كل الشباب ساعتها.. فكان ده رمز الفحولة ساعتها عندنا بقى.. وابتدينا نقوله يا عمو وشغلانة. المهم حكيتله على الحكاية كلها من طأطأ لسلامو عليكم.. وأحمد ابتدى يكلمنا بلهجة العالم الجليل اللي في أرذل العمر مثقل بخبرات الحياة والدنيا مع إنه أصغر مني بكام شهر:

- شريف.. هو عماد بياكل إيه؟

- سندوتشات حلاوة بالقشطة.. ليه يعني؟

- لا.. أنا قصدي بيشر بياه وهو بياكل؟

- أحمد!! عماد عاوز دقنه تطلع.. مش عاوز يعمل سونار!

- أيوه.. أنا بس باحاول أشوف إيه اللي مآخر الموضوع.

- يا ابني هو حمل؟؟!!

- يا شريف أنا باحلق كل يوم.. وعارف أنا باقول إيه!

طبعًا الكلمتين دول خلوني أحرص خالص ساعتها.. لأنني تقريبًا

كانت حالتي أزفت من عماد بس أنا ما كنتش مهتم بالموضوع..

إن شالله دقني ما طلعت.. يعني أنا كنت أعتبر بالنسبة لهم سميحة

أيوب.. بس أنا مطنش.













طبعًا الصويت لم يتوقف.. ومنظر عماد جابلي إسهال مزمن  
مدى الحياة من الرعب.. وهو يحاول ينزلي من فوق السفارة..  
وأنا باهدده لو مد إيدته هانط أمسك في اللبنة النيون فوق وهاكهرب  
نفسى وأجييله مصيبة.

عماد كلم أحمد وقاله إنه عاوزه.. وقاله إني موجود.. وأحمد  
مفيش عشر دقائق وكان بيخبط على الباب.. طبعًا نفس المشهد  
تكرر بعد ما أحمد حاول ينط من بير السلم وعماد مسكه من رجليه  
وشده جوه الشقة وأحمد دابب ضوافره في بلاط الطرقة اللي قصاد  
باب شقة عماد.

أحمد دخل الشقة من هنا.. وهوب في ثانية كان جنبي.. فوق  
السفرة.. وبكل فزع الكوكب ابتدى يصرخ:

- إيه ده يا شريف؟؟؟

- آخرة صبري يا ختنا!!!!!!!!!!!!!!!!!!!!!! اي.. بقيت مصاحب زومبي  
وغوريلا.. ابقى خلي شعر دقنك ينفعك يا دكر لما يفترسنا  
عماد دلوقت بعد ما اتحوووووول بسببك!!

طبعًا عماد شرح لأحمد نفس اللي قالهولي.. وأحمد شتمه ولعن  
اليوم الأسود اللي عرفه فيه.. وسألناه إزاي قدر يخبي الموضوع ده  
عن أبوه وأمه.

قال إنه بقى ينام الصبح ويصحى بالليل عشان ما يتقابلوش.  
طبعًا أنا ساعتها اتأكدت إن دي آخر مرحلة من مراحل التحول  
لزومبي مفيش تهريج.. هو بس باقي يعدي عليه ثلاث ليالي قمرية  
وهيطلع يعوي على سور البلكونة بالليل بعدها.. أنا عارف هاكون







## الاعتراف التاسع والعشرون نجفة قصر الهنيا

هو مين فينا معندوش حاجة ورث من ريحة عائلته العظيمة؟  
يعني أقصد أقول مين فينا معندوش سبحة مثلاً بتاعة والده وارثها  
منه ومبسوط بيها.. أو مين معندوش طقم صيني بتاع مامته وعایش  
عليه.

مين فينا معندوش صورة قديمة وارثها من جده.. أو عقد لولي  
وارثه من جديته.. قصدي جدته معلش..  
مفیش حد فينا معندوش حاجة واخذها كميراث عائلي مهما كانت  
الحاجة دي بسيطة أو رمزية.

وده بالضبط اللي حصل معايا أنا وإخواتي لما نينا قررت تفتح  
الأوضة العتيقة اللي عندها.. واللي قالها مخزن ومقفولة بقالها  
أكثر من أربعين سنة.. وفيها غالباً غنائم حرب المجرات القديمة  
وموميوات لفراعة دخلوا الأوضة دي على رجلهم واتحبسوا جوه  
وماتوا واتحنطوا لوحدهم وبلاوي زرقة كثير تانية جوه..



نينا قررت توزع شوية هلاهيل ومتعلقات من اللي موجودة عندها  
زي ما كانت بتعمل معانا من وقت للتاني وتديني مثلاً بالطو من أيام  
موقعة مرج دابق أو قميص بتاع بطليموس.. أي حاجة أثرية فيها  
أمراض منقرضة أنقلها لكوكب الأرض.

المرّة دي.. الخبطة جت في أبابا شخصياً.. لما كنا بنزورها..  
ودخلت هي المخبأ وخرجت بالأثر الفظيع:

- امسك يا عبد العزيز.

- إيه ده يا ماما؟

- دي النجفة اللي كانت في قصر المنيا بتاع جدي.

طبعا أنا ساعتها كنت بادور على النجفة اللي بتقول عليها دي  
ومش شايف في إيديها غير حدوة حصان تقريباً.. ومشبوك فيها  
إزازة مكسورة واحدة قد عقلة الصباع.. فأنا دبطني الفضول دبح..  
وسألت طبعا:

- هي إيه الإزازة المدلدة دي يا نينا لا مؤاخدة؟؟

- دي كريستال أصلي يا حبيبي.

- قصدك كريستالاية أصلي.. طب وفين إخوانها؟!

- لا مفيش.. هي كانت معمولة كده.

طبعا ولأن مكان إخوانها كان واضح إنه تم تدميره بفعل فاعل أو بفعل  
الركنة أو بفعل مضارع.. أي فعل والسلام.. أنا سكت وكبرت دماغني..  
وأبابا كمان كبير دماغه وما ردش بحاجة مفيدة.. إحنا البيت عندنا فيه  
كراكيب تكفي لإنشاء مصنع إعادة تدوير مخلفات ومش ناقص أساساً.  
طبعا الموضوع ده أثار حفيظة نينا قوي يعني.. وخلاها تنترفز







- هنعمل إيه يعني؟!

طبعا قعدنا نفكر بسرعة في حل للمصيبة السوداء دي.. هنتصرف  
إزاي.. ما هو إحنا حرام ناخذ إعدام في نجفة مقطوعة من شجرة  
أصلاً.. يعني يا ريتها كانت مليانة كريستال مثلاً.. دي لو اتعلقت  
تاني احتمالية إن أبابا يكتشف إن الكريستالة مش موجودة هنكون  
إحنا بنتجوز ساعتها أساساً.

إنما إحنا قلنا برضه هو مش هيرحمنا لو عرف حتى بعد الجواز..  
يبقى لازم نشوف حل نهائي للمصيبة دي.

- أيوووووووووووووه.

- إيه؟؟ قول يا شريف بسرعة!

- إحنا ناخذها لبتاع الإزاز.. وهو بيبقى عنده كريستال.. نقوله  
يركبلها كريستالة إزاز مكان اللي اتكسرت وخلاص.

- حلوة الفكرة دي.. يلاً بسرعة.

جري بقى بالشباشب شايلين النحاسة الهباب على قلبنا.. وجرينا  
بيها على محل الإزاز اللي في شارع مية وخمسة في المعادي عندنا..

دخلنا على الراجل المحل دخلة مباحث التموين على محل عنده  
سكر بودرة:

- عموووو.. عموووووووووووووووو!

- أيوه.. أيوه يا حبيبي خير؟ عاوز إيه؟

- حضرتك شايف النجفة دي؟

- هي دي نجفة؟!

- اعتبرها نجفة يا عمو مش وقت استظراف!!





توعى تشوفلها أخ أو أخت.. تتعلق في الهبابة دي.. وهو ما بقاش فاهم ليه.. وإحنا معندناش وقت نشرح.. هنتدبح بالصرمة يا اللي ما توعى.. إنما هو قالنا إنه مش هيقدر يفك كل ده ويركبه تاني قبل ثلاث ساعات.

يعني هيكون أبابا وصل وشاف المصيبة.. ومش هنلحق أصلاً نتشاهد على روحنا.. وا مصيبتا!!!!!!!!!!!!!!!!!!!!!!  
لازم تفكير سريع أنا وإخواتي.. نلم المصيبة دي إزاي؟ نداري الفضيحة دي إزاي يا ختا!!!!!!!!!!!!!!!!!!!!!!!!!!!!!!!!!!!!!! اي.. نعمل إيه أماما هتطلق؟؟!!

وهو ووب.. خطرت الفكرة.. إحنا نعلق النجفة الأولانية مكانها.. ونغطيها بقماشة كبيرة.. ونقول لأبابا إننا منضفينها عشان التراب وبكرة هنكمل وأي كلام.. وبكرة لما ينزل يروح الشغل.. الراجل بتاع الإزاز يبجي يركب نجفة قصر المنيا العتيق المحروق على دماغ اللي كانوا قاعدين فيه.. ويا شار ما دخلك در.. قصدي يا دار ما دخلك شر.

الراجل بتاع الإزاز سمع الكلام.. ركب النجفة الأولانية.. ونزل.. وهما ثلاث ساعات وشوية وجاءت لحظة الحقيقة.. أبابا وصل من الشغل.. ليحصد أرواحنا جميعاً لو عرف اللي حصل.

- إيه اللي انتو عاملينه في النجفة ده؟!  
- مغطينها عشان البرد أبابا.. هاهاها.. شربات.  
- إيه يا حيوان اللي مخليكو مغطين النجفة بالقماش؟!  
- أص... أصل.. إحنا بنضفها ب... ب... باللمون عشان النحاس

يلمع.. فالأ... فالأ... فمش عاوزينك تشوفها أبابا غير لما نكون  
هاهاهاها خلصناها كلها أبابا.. هاهاهاها.. عاملينلك مفاجعة..  
قصدي مفاجأة!

- ممممم.. يعني بكرة هتكونوا خلصتوها؟  
- شوف أبابا.. اعتبرها خلصت أبابا.. هي وحياتنا!  
طبعا الحكاية دخلت عليه.. ودخل هو الأوضة يغير هدومه..  
وإحنا بنحاول نشوف حته نعرف نصرخ فيها من فرحة النجاة من  
الغرق في كفوف أبابا اللي كانت هتبلعنا لو عرف.  
وإحنا بنحتفل بقى بكل فرحة مكتومة.. وبنسلم على بعض..  
وهاي فايغ.. وتشجيع جنوني حماسي مكتوم الصوت.. جرس  
الباب ضرب.. وخرج أبابا فتح.. لقي الراجل العجوز صاحب  
المحل واقف على الباب.. ومعاه ابنه.. وماسك نجفة نينا العتيقة  
في إيده:

- أنا ما رضيتش أروح حضرتك غير لما أظبطلكم النجفة  
وأركبها كريستال كلها.. ولو على الفلوس.. هاخذ نص  
السعر.. بس يا بيه كريستالة واحدة كان هيبقى شكلها زبالة  
قوي حضرتك!

اللي حصل لمدة شهرين بقى كان التالي:  
الواد الصغير كان بيتشعلق مكان النجفة سبت وحد.  
الوسطاني اتنين وتلات.  
وأنا أربع وخميس.



## الاعتراف الثلاثون شجرة العنب

الطفولة.. شجر الجوافة.. شجر المانجة.. شجرة التوت اللي  
كانت عندنا في الشارع.

الصيف وكل الفاكهة اللي فاتت دي.. واللي كان كل واحد فينا  
بيروح مع صحابه عشان ينزلها من على الشجرة.. سواء بتسلق  
نسانيسي الرشاقة.. أو بطوبة كبيرة تقترب من الدبشة تخترق الشجرة  
وأوراقها.. وبنسبة تزيد عن التسعين في المية الدبشة دي بتلبس في  
إزاز شباك أو بلكونة والموضوع بيتتهي بمحاولة هروب على إيدك  
ورجليك لحد البيت.

ده برضه كان عنوان حكايتنا مع العنباية.

العنباية اللي كانت محاولة التكعيبية المعمولة فوق جراج الدكتور  
المشهور اللي كان ساكن جنبنا.. العربية المرسيدس السوداء العظيمة.  
العنباية دي كنا بنستنى كل سنة عناقيد العنب تملأها وتبرق زي  
اللؤلؤ من بعيد ونبقى هنتجنن عليها.. إنما كل مرة كان بيطلع بواب



العمارة يلّمها للدكتور يا دوب قبل تنفيذ مخططنا السنوي الفاشل في  
إننا ندوق من التكعية دي إن شالله صباع محشي ورق عنب حتى .  
كذا سنة عدت علينا أنا وصحابي وإحنا بين خيارين: يا إما  
ناكل العنب ني .. نعتبره لمون ونطفحه .. يا إما نستنى عليه أما  
يستوي .. والحل الثاني ده كان بيتتهي دايماً بإننا مش بنلحق نقطف  
منه بذرة حتى .

تحس إن البواب كان مركبلنا جهاز تصنت عشان يتابع اللحظة  
صفر بتاعة الشلة .. ويمجرد تحديدها .. يقوم قاطف هو العنب كله ..  
وساينا إحنا نقطف الصفر .

حاجة تجيب اكتاب بصراحة .

الكلام ده لحد ما قررنا إننا الصيفية دي هتبقى آخر أيام الصيفية ..  
والعنبى شوية شوية .. نطلع فوق سقف الجراج .. واتقلبت بينا العربية  
على رأي الست فيروز .

ده قرار السنة دي يعتبر تحدي بالنسبة لنا .

هناكل من العنب ده يعني هناكل منه السنة دي .

- شريف .. هنطلع العنباية إمتى ؟

- باقي على لحظة الصفر .. ست حبات وعنقود .

- أيوه يعني هنطلع العنباية إمتى ؟

- إنتو بتستهيلوا؟ أنا مش مديكم ورقة فيها شفرة الكلام ؟

- ما إحنا ما فهمناش حاجة .

- أنا غلطان إني باعتمد على أغبيا .. ده مفيش غيري ممكن يساعد

الأستاذة نادية الجندي في مهماتها كلها .

















# حصريات كوميكس على التيليجرام

[t.me/comics\\_link](https://t.me/comics_link)

للقراءة رغبه لا تنتهه



## عن المؤلف

- مواليد القاهرة أكتوبر ١٩٧٦ .
- بكالوريوس تجارة القاهرة عام ١٩٩٨ (دور نوفمبر وناجح بالعافية).

• خمسة عشر عامًا في مجال الإدارة المالية.

• رئيس تحرير جريدة المواطن الإلكترونية.

• كاتب رأي في صحف «المصري اليوم» و«الوطن».

• صدر له كتاب «اعترافات جامدة» ٢٠١٤ .

• صدرت له رواية «حواديت السعادة» ٢٠١٥ .

• صدر له كتاب «غير قابل للنشر» ٢٠١٦ .

• أحد مؤسسي مؤسسة اسمعونا للعمل التنموي.

• شارك في إعداد وترأس تحرير عدد من البرامج مثل: برنامج

«مفيش مشكلة خالص» للفنان محمد صبحي، و«مننا وعلينا»

للأستاذ عمرو الكحكي.